



Isipla wei long promotim bisnis bilong yu

**GUTPELA KWALITI, GUTPELA PRAIS LONG PNG**

**Bisnis Kads** | **K120** | **K175**

200 kads + takis Printin tasol | 200 kads + takis wantaim disain wok

Wanpla sait, ful kala 300 gsm pepa.

Only at... **THEODIST LTD** THE STATIONERY SUPERMARKET

Waigani Drive, POM | Markham Road, LAE  
Phg: 313 9800 / 7232 1300 | Phg: 472 5488 / 7891 7854  
sales@theodist.com.pg | sales@theodist.com.pg

**KOLIM MIPLA NAO!**

**INSAIT:**  
Riviu bilong dispela wik  
- P2

Kadet ensinia wok trening wantaim Hawker Pasifik - P6



# Fri edukesen mani i redi long Tem 2

**Nupela MV YWAM PNG...**



YWAM Medikal Sip MV YWAM PNG i anka long bikpela bris bilong solwara long PNG Pots long Pot Mosbi taim em i kam long PNG long kisim wok long wok . poto: Nicky Bernard  
Lukim stori long pes 8..

Esther Bralyn Wani i raitim

OLGETA skul insait long kantri bai kisim Tusen Fri Fi (TFF) mani o skul subsidi mani bilong statim skul long Tem 2 long dispela yia. Dipatmen bilong Edukesen i salim mani mak olsem K97, 836,482.70 i go long Benk bilong Papua Niugini (BPNG) long givim long ol skul las wik.

Minista bilong Edukesen, Nick Kuman, i tok ol i salim mani i go insait pinis long 3-pela komesel benk long salim long ol 9,979 skul akaun pastaim bai skul i ken stat long Tem 2.

Tasol, sampela skul long kantri i no sekim ol akaun bilong ol yet long dispela, na ol i no save sapos mani i stap pinis o no gat.

Seketeri bilong Madang Katolik Edukesen opis, Bruno Tulemanil, i tok sampela skul long Madang provins i no kisim TFF mani yet tasol sampela i kisim pinis bilong statim Tem 2.

I go moa pes 2...



**Laipstail**




## SP HUNTERS

now on **tvwan**

Purchase a Digicel Play Box today K169 and get front row seats to all the action

WWW.TVWAN.COM.PG

available on **Digicel play**

# Dion sainim ol pepa long holim ol bai ileksen

**Michael Novingu i raitim**

MINISTA bilong Inta Gavman Rile-sens na Deputi Praim Minista, Leo Dion, i sainim tok orait pepa long Sinivit LLG presiden sia na tripela arapela kaunsel wod long Pomio distrik long go het long bai ileksen long votim nupla lidaman bai lukautim kaunsel wod na Sinivit LLG eria.

Mista Dion i tok sia bilong Sinivit

LLG i stap nating bikos Levi Orong husat i presiden long Sinivit i lusim dispela wok na resis long bai ileksen long Pomio Open sia.

Em i tok tripela sia long Marambu Wod 6 long Sinivit LLG, Wod 6 long Melkoi Rurel LLG, na Wod 31 long Marigugule long Sentrel Inlen long Pomio i stap nating bikos ol kaunsel i dai pinis. Na long Wod 6 long Marambu na Wod 6 long Uvol em feil ileksen.

Em i singaut long husat manmeri long Pomio distrik i gat laik long putim nem na resis long Sinivit LLG presiden sia, kaunsel wod long Marambu, Uvol, na Marigugule long kisim ol dispela sia na ranim Is Nu Briten provins wantaim trupela na strepla pasin.

Dion i askim ol kendidet long no ken yusim ol samting bilong gavman olsem kar, na ol arapela samting long taim bilong kempen na vot.

Em i tok ol manmeri i resis long Sinivit LLG, Marambu, Uvol na Marigugule long no ken mekim trabel long taim bilong bai-ileksen na lukim gutpela ileksen mas kamap.

Long wankain taim, Gavana bilong Is Nu Briten, Ereman ToBaining junia, i singaut long ol manmeri bilong Pomio Distrik long no ken mekim trabel long taim bilong bai-ileksen.

To Baining i singaut long ol man-

meri bilong Pomio long rispektim ol woklain bilong gavman na llektorel Komisn long karimaut wok bilong long lukim gutpela ileksen long Pomio distrik.

Em i tok i gat 17-pela kendidet i resis long Pomio open bai-ileksen bihain long bipo memba bilong Pomio, Paul Tiensten, i go kalabus bikos emi paulim bikipela pablik mani.

## Spika i bringim olupela baibel i kam long PNG

**Frieda Sila Kana i raitim**

**SPIKA bilong Papua Niugini Palamen, na Memba bilong Finschhafen, Theo Zurenuoc, husat i bin go long Yunaitet Stets long las wik wantaim 30 o moa deligesen, bai kam bek long Mande 27 Epril wantaim wanpela olupela baibel em i gat 403 krismas nau em i stap.**



Reveren Joseph Walters.

Long stat bilong dispela wik, ol lida bilong Bodi ov Krais long Pot Mosbi i bin singautim wanpela media komprens insait long haus palamen long tokaut long kam bilong Spika wantaim dispela olupela baibel.

Siaman bilong Pot Mosbi Minista Fratanel, Reveren Joseph Walters i tok olsem dispela baibel we King James yet long 1611 i bin givim oda long ol saveman i raitim nau em i stap long Yunaitet Stets wantaim wanpela man. Dispela man, Gene Hood em i wanpela bisnis man na em i bin baim dispela King James baibel long Inglan wantaim US\$ 1 milien na em i bin baim wanpela benk seif na putim insait long en long planti yia.

Reveren Walters i tok dispela man i bin kam raun

long PNG na em i bungim Mista Spika wantaim ol lain bilong em bilong senisim lukluk bilong haus palamen na kirapim nupela Yuniti Pos long kisim ples bilong olgeta totem pos. Em i lukim olsem 'Tok bilong God' bai kamap as bilong dispela Yuniti Pos, olsem na em i bin pilim long spirit bilong em olsem, em i mas givim dispela baibel long Papua Niugini long putim insait long haus palamen wantaim dispela yuniti pos.

Ol sios lida i bin mekim tok klia olsem, wok bilong bringim dispela baibel i kam long PNG em i bihainim wok bilong Holi Spirit tasol long plen bilong kirapim gutpela nesen aninit long God bilong Israel olsem Tok Promis we pastaim Praim Minista na papa bilong

kantri, Gren Sif Sir Michael Somare i bin mekim wantaim prea long yia 2007.

Dispela baible em ol i save kolim "Glori bilong Inglan" long taim bipo, na long taim em i stap long Inglan em i bin kamap wanpela strongpela kantri long wol wantaim Yurop. Tasol bihain taim ol i bin salim na em i bin go long Amerika, strong bilong Inglan na Yurop i go daun na Amerika i kamap wanpela supa pawa.

Ol sios lida i bihainim ol stori bilong kamap bilong dispela nesen stat long yia 2007 na ol i gat strongpela bilip olsem senis long haus palamen bai bringim Papua Niugini long wanpela kain strongpela nesen long wol. Em bikos em i gat olgeta samting long graun, bus na solwara we inap long mekim kantri i kamap strong long sait bilong ikononi.

Ol sios lida i tok, taim Spika Zurenuoc bai kam wantaim dispela olupela baibel, ol i redi long holim bikipela welkam bilong dispela baibel. Wok redi i stat pinis long ol PNGDF tu bai i stap long Jackson's Ples balus wantaim Praim Minista long kisim dispela baibel.

## Moa pablik sevan i rejista long Nesenel Aidentiti long NCD

NESENEL Aidentiti (NID) projek i statim pinis wok bilong kisim ol pablik sevan insait long NCD long rejista.

Insait long mun Epril moa long 2,500 Pablik Sevan insait long NCD i stat pinis long rejista. Ol tim bilong Nesenel Aidentiti Projek i wok long go long ol dipatmen long wokim ol rejistresen bilong ol pablik

sevan.

Ol dipatmen i soim gutpela sain long dispela wok, bilong wanem planti pablik sevan i kamap long rejista.

Nau i gat 20 Dipatmen i bin go insait pinis na Projek Dairekta, Roko Koloma, long Tunde taim em i pasin Rejistresen bilong Forestri opis i bin tokim ol wokman na wokmeri olsem em i amamas

long menesmen na ol wokman na wokmeri long givim sapot na wanbel bilong ol long taim bilong rejistresen.

Em i tok moa olsem, NID rejistresen em i nupela insait long kantri, olsem na em i laikim olgeta lain bai wokbung wantaim Gavman na ol pablik long helpim olgeta PNG sitisen i mas rejista.

## Tenpela dai long asua bilong stilim pik

Moa long tenpela man na wanpla belong ol i meri idai long han bilong birua namel long tupela klen.

Pait i bin bruk namel long tupla klen bilong Wapiako na Tapamu long stilim pik na planti bilong ol man i lusim laip.

Ripot i kam long Provinsal Polis Komanda Sif Supritenden Mark Yagen i tok, ol skul, kolis, na ol helt sevis insait long Hulua LLG i no stap na planti bilong ol paplik sevan i go ronawe pinis.

Het man bilong ol polis insait long Hailens region David Tei wantaim ol narapla opisa wantaim Ami na Hela Provinsal Gavaman hetman i bin go long stopim pait.

Mista Tei i singaut igo long tupela sait wantaim long stopim pasin bilong pait na kamapim gutpela sindaun.

Insait long dispela taim Bosman bilong Polis na Ami i askim Kaunselu husait i as bilong trabol long kamaut o nogat bai polis i kam painim

em na mekimsave long em.

Mista Tei i sukirim tok moa olsem yupla pipol mas luksave long ol Gavaman Sevis we nau stap kalabus Komo Magarima MP Francis Potape i bin kamapim.

Mista Yangen sapotim tok tu olsem pait i no inap long kamap, MP Francis Potape stap kalabus na Hela Gavana i stap hausik dispela pait i kamap.

Em i askim pipol long lusim pait na bihainim lotu.

## TFF mani i redi long Tem 2

**I kam long pes 1...**

Mista Tulemanil i tok em i wok yet long painim aut hamas skul insait long Madang provins i kisim ol TFF mani pinis.

Long dispela, Minista Kuman i tok wanem skul i gat akaun wantaim Benk Saut Pasifik (BSP) na Wespek Benk inap kisim mani long las wik, na wanem skul i gat akaun wantaim ANZ bai kisim mani bilong ol long dispela wik Mande.

Minista Kuman i

tok moa olsem hap mani i stap yet long akaun bilong TFF Dipatmen bilong Edukesen bai ol i yusim long peim ol skul we ol i no bin kisim olgeta mani bilong ol long Tem 1, na ol narapela skul husat i no bin inapim 4-pela stended mak.

Em i tok moa olsem ol provinsal atoroti i sekim yet 3,981 skul long painim aut olsem ol i wok o no gat, na sapos ol i painim aut olsem ol i wok yet bai ol i givim mani long ol long pinis bi-

long dipela mun.

Nesenel Gavman i givim K605 milien total mani long TFF long 2012 na hap mani olsem K300 milien i stap yet bai i karamapim Tem 3 na 4.

Olsem K300 milien i go insait pinis long ol skul insait long kantri long Tem 1 na 2.

Minista Kuman i tok gavman i givim olsem K2 bilien long TFF polisi long 2014. Em i tok ol bai yusim K7 bilien wantaim sapot bilong AusAID long trenim ol het bilong ol skul

long fainensel menesmen na akauntabiliti long dispela yia.

Long wankain taim, em i tok ol skul bod na ol edministresen i mas lukautim gut ol dispela mani na lukim ol pikinini i kisim kwalati edukesen long namba wan de i go las de bilong skul.

Tasol, Mista Tulemanil i tok dispela fri edukesen, no projek fi polisi na TFF mani i mekim na namba bilong ol sumatin i winim namba bilong ol tisa na ol klasrum tu i pulap stret.

## Kuima blacks - pawa



Ol boi bilong Kuima i wok long ful fos long lukautim bikipela sip bris long kantri. Sekyuriti long Pot Mosbi sib bris i tait. Yu traim go long hap, em bat long yu go insait. Yu bai save long ol tru wok bilong ol sigi bois, taim

yu go bungim ol Kuma Blacks long sip bris. **Long foto: ( L-R) Bata Kerenga, Paul Dika (supavaisa) na Cletus Huams. i stap long duti long asde.**

**Poto: Nicky Bernard.**

# Polis i redi long SP Gems

I GAT wanpela polis operesen i redi pinis long wok insait long Pasifik Gems long lukautim ol pilaia long ol narapela Pasifik kantri bai kam pilai.

Dispela ol polis bai lukautim ol pilaia long ol wan wan hap bilong pilai na ol ples bai ol i slip long em tu na pilim seif.

Polis Komisina Geoffrey Vaki i tok wan wan komanda bai lukautim wan wan hap bilong pilai. Em i tok dispela em long lukim olsem stil pasin, pusim narapela na resis long go insait long hap bilong pilai, pait o dring bia na spak long pablik i no ken kamap.

Long dispela, Mista Vaki i salensim ol pablik long wanem rot bai ol i helpim long mekim ol pilaia long ol Pasifik kantri i pilim seif taim ol i kam stap na pilai.

Em i tok moa olsem olgeta sitisen o manmeri i mas harim tok na bihainim ol lo na no ken bikhet. Em i tok dispela em wok bilong pablik tu.

# Bisnis long Oro bai isi wantaim 4-pela nupela bris

Stanley Nondol i raitim

WOK Bisnis long sapatim laip bilong ol pipel long Oro Provins bai isi bihain long 4-pela nupela bris long joinim planti tausen manmeri i pinis long mun Jun neks yia.

Gavman bilong Australia i putim K139.4 milien wantaim sapat bilong PNG gavman nau i wok long bildim 4-pela nupela bris long Oro.

Ol 4-pela bris em Kamusi, Eroro, Girua na Ambogo we Saiklon Guba bin bagarapim long 2007.

Dispela hevi i mekim ol pipel long hap i hat long mekim bisnis olsem salim ol gaden kaikai, mekim tred stua, salim oil pam na ol trenspot bisnis bikos 4-pela bris i bruk na mekim hat long ol pipel i kisim ol samting i kam long taun na ol ples we i gat besik sevis.

Planti ol papamama i kisim taim long salim ol samting na sapatim ol pikinini long skul fi. Em i bin hat tru bikos bikipela wara i pasim rot. Ol kar i save brukim wara na long taim bilong ren na tait wara em i moa hat.

Taim mipela i go wantaim ol delegesen bilong Australia Hai Komisina, Deborah Stokes, tim bilong Gavana Garry Juffa na Seketeri bilong Woks David Vere, na Seketeri bilong Trenspot Roy Mumu, mipel i sori long lukim olsem Saiklon Guba i bagarapim bikipela hap bilong provins. Na planti bilong ol bagarap i stap yet na mekim laip bilong pipel i hat.

Liklik namba bilong PMV tasol i ran long hap na ol i sasim ol pasindia bikipela mani. Ol kos bilong kaikai na samting long stua i go antap bikos kos bilong trenspotim ol dispela samting i dia.

Papa bilong PMV i sasim bikipela mani long papa bilong stua na papa bilong stua srukim hevi i go long ol pipel long ples.

Ol pipel i bungim dispela hevi bihian long Saiklon Guba ba i bungim dispela hevi yet.

Australia gavman, Dipatmen bilong Woks i putim ol temporeri bris long tupela hap. Wanpela long Girua Riva na narapela long Kamusi Riva.

Hai Komisina Stokes i tok gutpela rot na bris em i lewa bilong ikonmik gro na bai helpim ol bisnis long PNG long givim gutpela sevis.

Na bildim ol bris long Oro em i kamap long gutpela bilong ol pipel long Oro na PNG.

Long tupela hap ol kar i wok long brukim wara. Tasol long taim bilong ren, wara i tait na mekim hat long kar na ol pipel i kisim taim long muv go kam.

Dispela rot tu i go long Kokoda Trek na em ples bilong ol turis. Em i no luk gut tumas long ol turis long go long hap, ol i ken pret.

Bihain long 7-pela yia, Australia gavman i harim kraibilong ol pipel na i helpim PNG gavman long wokim 4-pela nupela bris wantaim K139.4 milien.

Taim dispela bris i pinis long Jun neks yia em bai opim rot bilong bisnis long ol pipel long ples, tu opim rot bilong ol turis long go long hap.

Ples long Popondetta na Oro em nais tru.

Ol pipel tu em o, nais na i harim tok. Tasol ol sevis olsem ol bris i bagarap i mekim planti sevis olsem bisnis, haus sik, skul na i no ron gut long sampela yia.



Mella na Lulu bilong Gems Oge-naising Komiti i toktok long wanpela tim lida.



## 2015 Pacific Games **TICKET GIVEAWAY!**

Simply purchase **airtime TOP UPs** via BSP Mobile Banking during **APRIL** to be selected. Customers will be contacted directly with details posted on BSP's Social Media.

**TOP UP NOW \*131#**



20 x general admission double passes plus 1 major pass to be given away weekly.

www.bsp.com.pg



Official Sponsor of the 2015 Pacific Games

# Birua long rot kilim 14 pipel

WANPELA birua long rot long Jiwaka provins las wik i kilim 14 pipel. Ol dispela pipel i bin dai long taim wanpela 15 sita bas ol i bin pasindia long en i pundaun i go daun long wanpela baret wara long Not Waghi, Jiwaka Provins. Praim Min-

ista Peter O'Neill husat i bin stap long Pomio long dispela taim i bin salim tok sori bilong em i go long ol famili bilong ol dispela pasindia husat i bin dai long dispela birua.

# Gordons Maket bai pas

Gordons maket long Mosbi bai pas long 17 Me inap tupela yia. Ol lain husat i save salim kaikai na ol arapela samting long maket bai i mas go long ol arapela maket insait long siti. Dispela tok save i

kam long maket divisen bilong Nesanel Keptial Distrik Komisin. Bai gavman bilong Nu Silan i sanapim wanpela nupela tri stori maket long dispela eria long mani inap long mak bilong K7.1 milien.

# Nupela polisi bilong ol disebel i redi nau

Nupela polisi bilong ol disebel pipel long kantri i redi nau na Minista bilong Komyuniti Dvelopmen, Yut na Rilijon, Delilah Gore bai kisim i go long Kabinet i givim tokorait bilong en. Minista i bin sainim dispela nupela polisi las wik Fraide. Minista Gore i tok dispela polisi bai givim ol disebel pipel raits bilong ol olsem ol sitisen bilong kantri, na olsem wanem Gavman bai lukautim na sapotim ol. Minista i tok ol sios, na narapela ogenaisesen i bin wok bung wantaim dipatmen bilong em long stretim dispela nupela polisi. Minista Gore i tok tu olsem em i hop Paliamen bai givim tokorait long Lukautim Pikinini Ekt long taim ol i bung gen long mun Me.

# Nupela eksekutiv bilong PEA

Pablik Employis Asosiesen i gat ol nupela eksekutiv opisa nau long mekim ol wok bilong lukautim ol raits na gutpela tems na kondisen bilong ol wokman na meri. Ol dispela nupela eksekutiv opisa em Emma Faiteli, Presiden; Iso Morea, deputi Presiden; Polopan Kilangit, vais deputi presiden na ol opisa husat i makim Sauten, Momase, Hailans na Niugini Ailan rijon.

# Australia helpim Oro long ol bris

Gavman bilong Australia bai senisim foapela bris long Noten Provins em saiklon Guba i bin bagarapim long 2007. Mani bilong sanapim ol dispela nupela bris bai inap long mak bilong K139 milien. Las wik Gavana bilong Noten Gary Juffa wantaim Hai Komisina bilong Australia Deborah Stokes, Seketeri bilong Dipatmen ov Woks David Wereh na Seketeri bilong Transpot Roy Mumu, i bin go lukim wok i kamap long ol dispela bris. Wok bilong ol dispela foapela bris, Eroro, Girua, Ambogo na Kumusi i stat pinis. Long taim wok long Kumusi bris i pinis, bai em i kamap longpela tu lein bris long kantri. Longpela bilong en bai 285 mita na Makhm bris long Morobe i namba tu long en. Olgeta wok long ol dispela bris bai pinis long Jun 2016.

# Gavana Aigiru i sik

Gavana bilong Hela, Anderson Aigiru i bin kisim tritmen long intensive kea long wanpela praivet haus sik long Mosbi las Fraide long taim em i bin sik.

Bai em i go long wanpela haus sik ovasis long kisim kidni dailasis tritmen long helpim em. Mista Aigiru i bi-

# Memba givim 10 pesen bilong pe long sios

Memba bilong Naweb, Gisuwat Siniwin i promis long givim ten pesen long pe bilong em i go long wok bilong sois.

Em i mekim dispela komitmen taim em i visitim Gaing Kusip Paris Lutren Sios long Boana las wik.

Em i tok ol Kristen i bilip olsem ol i mas givim go bek long God wanem samting ol i kisim.

Mista Siniwin i mekim komitmen long givim K8000 long helpim Gain-Kusip Paris we i gat 8-pela kongregesen. Wan-

wan kongregesen bai kisim K1000.

Em i mekim narapela K2000 komitmen long Gaing Kusip Paris. Dispela em bai givim long pe bilong em.

Long wankain taim memba bilong Yangoru Saussia na minista bilong Tred, Komes na Industri, Richard Maru i givim 10-pesen bilong DSIP mani i go long wok bilong sois.

Minista Maru i tok em i bihainim baibel long Malakai 3:10 "kisim olgeta tait o 10 pesen i go

long God".

Aninit long dispela wanwan sois long distrik bai kamap wantaim tupela projek long kisim mani long helpim wok bilong ol.

Minista Maru i tok wanwan sios i mas gat ol memba long mak bilong 1000 na go antap. Em i tok dispela hepim em i no bilong wan man pasta o ol siso i gat liklik memba.

Minista Maru i tok dispela 10 pesen DSIP go long sois bai kamap olgeta yia taim em i Stap memba bilong palamen.

# Praim Minista raun long Pomio

Las wik Praim Minista Peter O'Neill i bin go lukim Warangoi long Sinivit lokal level gavman eria long Is Nu Briten.

Mista O'Neill i bin go kempen long kendidet bilong Pipels Nesanel Kongres, Francis Waina long Pomio bai-ileksen. Em i bin go long Warangoi na Palmalmal stesin long dispela raun bilong em.

Mista O'Neill i tokim ol pipel husat i bin kamap long stesin olsem bai em i helpim long bringim developmen i go long Pomio. Em i tok Pomio i gat K25 milien i stap long distrik sapot grent long infrastraksa developmen. Ol arapela gavman minista na Is Nu Briten Gavana i bin stap wantaim Praim Minista long dispela lukluk raun.

# Tiensten kisim 3-pela moa yia

Memba bilong Pomio bipo, Paula Tiensten i kisim 3-pela moa yia antap long 9 yia kalabus. Nesanel kot long Kokopo i bin tokaut long disisen bilong em las wik. Tiensten husat i gat 49 krismas i bilong ples Sampum long Pomio, Is Nu Briten provins. Bai em i kalabus inap 12-

pela yia long Bomana haus kalabus. Kot i painim em i rong long opisal korapsen, misapropriesen na giaman na kisim ol samting. Ol dispela rong i kamap long K3.4 milien mani, gavman i bin makim long stretim gen ol olpela plantesen long Is Nu Briten Provins.

# NAQIA putim tambu long ovasis kakaruk

Minista bilong Egrikalsa Tommy Tomscholl i tokaut olsem PNG i tambu long kisim ol mit bilong kakaruk i no tan i kam long Australia. Nesanel Egrikalsa Kwarantn na Inspeksen Atoriti

(NAQIA) bai go pas long mekim wok bilong stopim ol kampani i kisim kakaruk mit i kam long Australia.

PNG i putim dispela tambu bihain long wanpela televisen ripot i toktok long sik ol pipel i ken kisim long ol jermis i stap long mit bilong kakaruk i no tan.

# Pes bilong traibel pait i senis

Nupela stail bilong rentim ol gan na paitman long kilim ol birua, i senisim pes bilong traibel pait long Enga. Provinsal Polis Komanada, George Kakas i bin mekim dispela toktok las wik bihain long sampela ganman i bin kilim foapela pipel long Sopas.

Ol polis i mekim wok painimaut yet, tasol Suprintenden Kakas i tok ol ganman i kilim ol dispela lain bikos ol i no amamas long mani ol i kisim long gan na mani bilong baim ol paitman.

Suprintenden Kakas i tok ol dispela paitman i gat prais bilong ol gan i go inap long mak bilong K20,000. Em i tok pe bilong ol sotgan em inap long K5,000 na ol kain gan olsem ol M16, SLR (self-loding raifol) o AK47 (Kalasnikov) i stap long mak bilong K20,000.

Em i tok dispela pasin bilong haia long gan na ol paitman i kamap wanpela bikpela bisnis. Na dispela nupela pasin bilong pait i wok long skruim ol traibel pait i go moa yet, bikos ol ausait lain i kisim mani long pait na long rentim gan bilong ol tu.

# Ol wok long Lae rot i ran gut

Wok long dispela 26 kilomita rot long Lae i go long Bukawa i ran gut. Kost bilong dispela rot em inap long K9 milien tasol provinsal Dipatmen ov Woks i kisim K2 milien we ol i yusim pinis K1.9 milien pinis long wokim 10 kilomita bilong dispela rot.

JICA i wok wantaim ol long mekim dispela wok bilong stretim dispela rot. I gat sampela hevi bilong painim mani long baim ol wokman na ol papagraun long Situm i putim kleim bilong ol, tasol wok i go het long dispela rot.

Ol i wetim Gavman long givim K7milien long pinisim olgeta wok long dispela rot.

# Kensa haus i op long Lae

Ol lain husat i gat sik kensa na i wok long kisim kemoterapi long Angau haus sik long Lae, i gat wanpela haus bilong slip nau. Dispela nupela haus i gat 20 bet na wanpela haus kuk i bin op long las wik Fraide.

Mani bilong sanapim dispela haus

i kam Papua Niugini Kensa Rilip Sosaiti wantaim helpim i kam long Wimen Doktas Asosiesen, Kensa Faundesen na Oil Search Limited. Dokta John Niblett na meri bilong em Andrea i bin go pas long wok bilong dispela haus bilong helpim ol siklain.

# Vaki givim tok lukaut long ol polis bareks

Polis Komisina Geoffrey Vaki i tok ol polis opisa husat i stap long ol polis bareks i mas lukautim propeti bilong gavman na ol pikinini bilong ol husat i save dring spak na smokim mariwana na distebim ol arapela plisman. Komisina Vaki i mekim dispela tok lukaut bihain long ol komplek i kamap long ol bikhet pasin ol pikinini bilong ol plisman i save kamapim insait long ol bareks. Mista Vaki i tok Spesel Sevis Divisen bilong Polis i mekim wok painimaut nau long ol bareks na bai ol i givim ripot i go bek long em. Mista Vaki i tok sapos ol pikinini bilong ol plisman i brukim lo, orait polis i mas sasim ol tu.

# Ol 19 kalabus ranawe

Ol polis long Buka i wok long painim 19 kalabus husat i ranawe long Buka polis rumgat bihain long pawa blakaut.

Ol dispela lain i ranawe long 3 klok apinun bihain long ol i katim ol ain long windo bilong rumgat. I gat 70 kalabus i stap long dispela polis rumgat na nau 19 i ranawe. Ol polis long Buka i tok save long ol famili na pren bilong ol dispela kalabus long no ken haitim ol, tasol bringim ol i go bek long han bilong polis.

# UPNG SRC i go pas long mekim bisnis

**Edukesen wantaim God i gat gutpela bihain taim**



Pasta Charles Koi i save tism RI long ol dispela sumatin long Bukapena Praimeri Skul long Mul Baia Distrik insait long Westen Hailans.

**Esther Bralyn Wani i raitim**

**OL Skul Ripresentativ Kaunsel (SRC) long Yunivesiti ov Papua Niugini (UPNG) i wok bung wantaim Ipili Pogera Investment (iPi) Grup ov Kampani na i kamapim win mani olsem K216 691.30 long dispela yia.**

nesip senta we ol sumatin i save kisim skul long en long rot bilong mekim bisnis. Em i bilong ol fainel yia sumatin tasol husat i gat intres long mekim bisnis bihain taim. Tasol 20 sumatin husat i mekim gut bai kisim setifiket. Pro Vais Sensela Profesa Pulapa Subba Rao i tok SRC i lukautim liklik kopi stoa na liklik stoa insait long skul wantaim iPi. Em i tok tupela i save skelim win mani.

Profesa Rao i tok SRC bai mekim wanpela prin sop we prais bai go daun olsem 30t. Em i tok SRC i mekim ol dispela liklik bisnis insait long skul bai helpim ol sumatin, ol tisa na ol famili bilong ol. Long wankain taim, projek menesa bilong iPi, Peter Denmead i tok ol i laik helpim SRC long givim bek long komyuniti na kamap hap bilong komyuniti tu. UPNG SRC Presiden

Roy Cornelius, i tok ol i laik wok wantaim iPi na skul edministresen long putim ol nid bilong ol sumatin namba wan olsem ol wara kula, na taim ol go aut long pilai ragbi long ol narapela skul. Mista Cornelius i tok ol i bai yusim ol dispela win mani long helpim ol sumatin. Em i tok dispela liklik bisnis bai inap long ol sumatin i ken baim na yusim.



Pro Vais Sensela Profesa Pulapa Subba Rao (raithan) i sekanim UPNG SRC Presiden Roy Cornelius (lephan) taim em i kisim win mani na Projek Menesa bilong iPi, Peter Denmead i lukluk.

**Esther Bralyn Wani i raitim**

EDUKESAN i save senisim ol pikinini na mekim ol save long kain kain samting taim ol i gro bikipela tasol sapos ol i no save long God bai ol i no inap gat gutpela sindaun bihain. Pasta Charles Koi bilong Papua Niugini Baibel Sios long Bukapena insait long Westen Hailans provins i tok taim em i lukim kain kain bikhet pasin i kamap long ol skul. "Mi ting nau i gutpela taim long ol elementri i go long ol kolis na yuni-

vesiti we ol i mas gat ol tisa o pasta o ol manmeri bilong lainim ol long tok bilong God. Rilises Instraksen (RI) em i wanpela gutpela rot bai helpim ol pikinini. Taim tok bilong God i stap insait long ol pikinini ol bai gat pret bipela long God na ol bai bihainim ol lo bilong skul na stap aninit long ol tisa na ol papamama," Pasta Charles i tok. Em i tok moa olsem dispela bai helpim ol pikinini long bihainim lo bilong kantri na kamap gutpela lida long bihain. Long wanem tude kantri i painim ol gutpela lida i

pret long God na ol honest manmeri long lukautim kantri bilong yumi. Pasta Charles i tok bikipela wari bilong em long lukim Edukesen Dipatmen i ken putim ol kos olsem RI wanpela namba wan kos olsem ol narapela. Long wanem sapos ol sumatin i no save long God bai ol i bungim bagarap bihain taim. Long dispela, RI i ken kirapim tingting bilong ol sumatin long save gut long tok bilong God moa na bai ol i develop long Ikonmik, Sosal, Mental na Spirisuel sait wantaim.

## Kadet ensinia wok trening wantaim Hawker Pasifik

TUPELA yangpela meri i stap namel long ol tenpela Air Niugini kadet ensinia, i statim pinis "wok trening" bilong ol wantaim Hawker Pacific long Cairns, Australia las wik. Dispela trening i bihainim tupela yia ol i bin wokim trening wantaim Air Nu Silan Eviesen Institut long Christchurch, we ol i bin pinisim long las mun. Wok trening bilong ol bai stap 9-pela mun long aeronautics, 10-pela modul. Ol modul i kam long tupela hap, avionics na mekanik, em tupela ol treid bilong balus ensinia wok. Linda Eremas, wanpela meri kadet i tok, ol i gat bikipela tenkyu long Air Niugini na ol i bel kirap long kam bek na wok wantaim Air Niugini. Linda i givim tok stia long ol narapela nupela kadet olsem, "Em i no samting bilong pilai, em i hatpela samting. Yu mas gat gutpela tingting na pasin na olgeta taim yu mas traime long winim dispela gem." Narapela kadet ensinia, Solomon Kawage i tok tupela yia trening long

Nu Silan i bin hatpela tasol ol i bin kisim gutpela taim tu. "Mipela i bin lainim wok long ol bikipela balus na sans long wok wantaim ol pipel bilong ol narapela kantri. Mipela i stap long nupela kain ples we em i kol tumas, na i mekim laip i hat liklik, tasol mipela i pilim orait bihain long sampela taim gen," Em i tok. Air Niugini i save putim bikipela mani long trenim ol wok manmeri long wok bilong kadet ensinia na pailot long olgeta wanwan yia. Kos bilong trenim wanpela kadet em i K600,000 long wanpela 4 yia taim. Air Niugini i putim K16.5 milien olgeta long trening baset bilong dispela yia. Ensinia kadet skim em i wanpela 4-yia program bilong kamapim save long ol yangpela kadet ensinia long kamap Laisens Ensinia wantaim ol skul bilong ovasis. Ol kadet husat i mekim gut long trening bilong ol bai stap 4-pela yia wantaim Air Nu Silan, long kisim moa trening wantaim Eviesen Institut. Pinis bilong en bai ol i kisim Yuropian Eviesen Sefti Ejensi



Grup poto bilong olgeta ensinia kadet insait long Air Niugini Hangar long Pot Mosbi, Jackson's Ples Balus.

(EASA) besik laisens. Nau yet, Air Niugini i gat 39 meri long kadet program we siksipela i kisim trening long Nu Silan na Aus-

tralia. Bod na Menesmen bilong Air Niugini bai putim mani tu long stretim Hangar bilong stretim ol balus long

Jackson's ples balus long Pot Mosbi na bihain bai olgeta hevi mentenens bilong ol aircraft bai ol i wokim long Papua Niugini yet.

# Tambu long ol polis salim buai long bareks



**Esther Bralyn Wani  
i raitim**

**OL** sitisen o ol man-meri bilong Papua Niugini wantaim gavman i lukluk long ol polis long bihainim lo olsem ol standing oda. Tasol ol sampela polis i brukim ol sampela lo olsem salim buai, dring bia na bagarapim ol samting.

Dispela i mekim Polis Komisina Geoffrey Vaki i kisim olgeta bikman long polis fos na go lukim Gordon Polis Bareks long Tunde we planti toktok i bin kamap long hap.

Mista Vaki i tok tambu em i long salim buai na ol narapela kaikai insait long bareks, ol bikhet pasin taim ol i dring bia, pilai redio bikipela na distebim narapela, ol pikinini i bikhet, dring bia, tok no gut na raitim grafiti long ol bilding.

Na i tambu long ol wantok i pulap long ol liklik rum we i apim pawa na wara bil, na i

givim hevi long Polis Di-patmen i baim.

Em i tok dispela pasin i givim nem no gut na bagarapim nem bilong Royel Papua Niugini Konstabluri.

Em i toktok long ol famili bilong ol polis na ol polis olsem husat i karim buai go insait long bareks na salim o i no bihainim standing oda, bai i lusim wok bilong ol na i gat sas long en.

Long wankain taim, wanpela Godons polis opisa, Steven Aua, i makim maus bilong ol polis na famili long hap na tok tenkyu long Mista Vaki i go long hap na lukim ol na kain stap ol i gat long hap. Em i tok tru tru ol polis i save karim ol buai i go insait long Bareks na salim.

Long dispela, Mista Vaki i tok olgeta famili bilong ol polis bai stat long Sarare na klinim bareks long tupela awa na dispela bai go aut long ol narapela bareks tu.

Polis Komisina Geoffrey Vaki i toktok long ol polis na ol famili bilong ol polis long Godons Polis Bareks.



## Papua Niugini NESENEL AIDENTITI PROJEK



**Gutpela bilong yu gat Nesenel ID Kat bilong yu yet**



**Pasport**

- ▶ Insait long kantri: Kat bilong yu bai helpim yu long raun i go long ol narapela provins.
- ▶ Intenesenel: Kat bilong yu bai helpim yu long kisim paspot na visa long go lukluk raun long narapela kantri

**“Yu mas Rejista nau na stap insait”**

Depatman bilong Nesenel Plening  
i go pas long dispela



# Wanpela hait sik i kilim ol pipel long Nigeria

**WANPELA sik i kamap hait tasol long kantri Nigeria na kilim pinis 18 pipel long Ode-Irele taun, bi-long Ondo Stet long Afrika.**

Sik i kamap pastaim tru long Ode-Irele town, Ondo stet na bi-hain i go long ol narapela hap, in-sait long dispela mun tasol.

Ol mak bilong dispela sik em olsem man i kisim bai i no inap luk-luk gut, lusim skin, hetpen na em i ken airaun. Sik i wok long kilim man insait long 24 haua tasol bi-hain long ol i kisim sik.

Ol helt opisa bilong dispela hap wantaim ol Wol Helt Ogenaisesen saveman meri nau i stap long dispela taun long traun long luksave long dispela sik.

Ol tes ol i wokim i soim olsem dispela sik i no wankain olsem Ebola na ol narapela vaires, ol mausman bilong Ondo gavman, Kayode Akinmade i tok long AFP nius ejensi.

Em i tok long dispela sik olsem em i "hait sik".

Mausman bilong WHO Gregory Hartl i tokim AFP olsem ol lain husat i kisim dispela sik i stap soim ol sain bilong en long namel long de 13 na 15 Epril.

Dispela nupela kain sik i wok long kisim stret insait bilong bodi we i save mekim wok, helt komisina, Dayo Adeyanju i tokim ol nius lain bilong Nigeria Premium Times.

Ol savelain bilong WHO i tok bWanpela wok painim aut i kam aut long AFP long Geneva i lukim olsem ol marasin bilong kilim ol gras na bus i kamapim dispela sik na ol dai bilong 18 man na meri long sautwes Nigeria taun long las wik.

"Strongpela ges i olsem dai bilong 18 pipel em i kamap long marasin bilong kilim gras," WHO mausman Gregory Hartl i tok.

"Ol tes ol i wokim i no soim sain bilong binatang i save karim ol sik," em i tok moa.

Ol save lain i kirap no gut long ol dispela kain sik na dai i kamap long dispela wankain hap we Ebola i bin bagarapim ol pipel pinis.

Helt Komisina bilong Ondo stet, Dayo Adeyanju, i tokim AFP long las wik Sarere olsem 23 pipel i kisim bagarap pinis.



Ol dokta i sekim dispela hait sik long laboratri. Dispela sik i kilim pinis 18-pela manmeri long Nigeria pinis.

## Nupela YWAM Medikal Trening Sip statim wok

### Frieda Sila Kana i raitim

MV YWAM PNG, nupela Medikal Trening Sip bilong Yut Wit A Misin (YWAM) i kamap pinis long Pot Mosbi long dispela wik tasol.

Praim Minista Peter O'Neill i bin kamap long Tunde dispela wik long PNG Pots bikpela bris bilong solwara na i katim ribon long komisenim MV YWAM PNG long mekim wok i go long ol rural ples bilong ol provins.

Dispela sip em i senisim narapela liklik sip we YWAM i bin yusim long mekim wok bilong helt long ol rural eria bilong Sauten Rijon inap long 11-pela yia o moa. MV Pacific Link i bin wok planti mun insait long ol ples long Galp, Westen, Morobe, Oro na Milen Bei pastaim long em i pinis na i go long Australia.

Papua Niugini gavman i amamas tru long namba wan wok bilong YWAM wantaim sip, MV Pacific Link olsem na aninit long Sios Patnasip program bilong Nesenel Gavman, Minista bilong Nesenel Plening, Charles Abel i bin givim K5.5 milien long statim fan resing bilong baim nupela sip long las yia.

Bihain long en, planti narapela ol han bilong gavman olsem ol provinsal gavman, PNG Pots na ol narapela SOE wantaim praivet sekta na ol wan wan man meri i bin givim moa mani long sait bilong PNG.

Nau PNG i amamas long lukim nupela sip i bikpela moa, i gat 5-pela dek i kam kamap long Pot Mosbi. Em i gat bikpela spes moa long mekim wok klinik, i gat hap bilong wokim ol trening bilong ol helt wokman na meri, na gutpela hap bilong ol volantia bilong YWAM i slip na mekim wok tu.

Petron bilong YWAM sip long PNG, Sir, Rabbie Namaliu wantaim Petron bilong YWAM Australia,



Mike Reynolds i bin tok tenkyu tru long ol gavman na ol pipel bilong Australia na Papua Niugini long bikpela sapot tru ol i givim long kamapim inap mani stret long baim dispela sip long taim stret.

"Tupela gutpela kantri i save wok patnasip long kamapim planti gutpela wok. Tude em i bikpela de bilong amamas long dispela wok patnasip," Mista Reynolds i bin tok long taim bilong opim sip.

Petron bilong PNG YWAM, Sir Rabbie Namaliu i mekim luksave

long ol Stet Kampani na ol praivet kampani olsem Stimsip, Interoil na ol narapela long bikpela sapot bilong ol. Em i tok wantaim helpim bilong ol gavman na pablik long ol yia i go pinis, YWAM i bin inap long givim 23,000 banis marasin na sut long ol pikinini insait long ol 6-pela provins pinis.

Dispela sip em i olsem mama sip we i gat ol liklik bot bai em i save salim i go aut long ol ples, bihainim ol bikpela wara, liklik han wara na tu long nambis long kisim ol helt



Praim Minista Peter O'Neill i katim ribon long givim tok orait long MVYWAM PNG i ken go het long mekim wok insait long ol solwara na ol bikpela wara bilong PNG.

Antap: MV YWAM PNG nau i stap long PNG Pots bikpela bris bilong solwara.

wokman na meri i go long helpim ol turangu pipel long ol ples.

Praim Minista O'Neill i mekim luksave long Ken Mulligan, CEO bilong YWAM na ol volantia husat i wok wantaim em.

"Foapela yia i go pinis, mipela i bin gat wanpela helt plen we i no gat inap mani long mekim ol wok aninit long plen. Tasol nau i gat mani na dispela gavman i laikim wok patnasip long lukim dispela 10-yia helt plen i karim kaikai," Praim Minista O'Neill i tok.

"Mi lukim dispela vidio bilong ol tarangu manmeri na pikinini kisim ol bikpela sik na mi wari tru long Westen Provins. Bilong wanem Westen Provins em i wanpela provins we i gat planti mani," Mista O'Neill i tok.

MV YWAM PNG bai stap long Pot Mosbi bikpela bris bilong solwara long hap bilong PNG Pots inap long Sarere 25 Epril na bihain bai em i ran i go long Westen Provins na em bai stap 7-pela mun long mekim wok long hap.

# Wantok nius ripota kisim digri bilong wok nius ripota

**WANTOK Niuspepa** i gat bikpela amamas long lukim wanpela yangpela nius ripota husat i bin wok trending wantaim kampani long holidie taim long las yia i kisim digri pepa bilong em long taim bilong PNG Yunivesiti greduesen long stat bilong dispela mun.

Mosbi bikos *Wantok Niuspepa* i bin laikim kain wok bilong en na kisim em olgeta long wok wantaim kampani.

Insait long wok bilong nius na midia nau i gat planti meri i wok strong long skruim toktok bilong developmen bilong ol meri na ikonomi bilong kantri i go yet.

Mis Esther Braylyn Wani, em i bilong Westen Hailans tasol nau em i stap long Pot

Mis Wani i kisim Journalism na Pablik Rilesens digri pepa.



(L-R) Mama Maggie Wani, Esther Wani, Papa Petrus Wani na Petrus Wani Junia i holim bebi bilong Esther, Charlpetson Koi bihain long taim bilong greduesen.

## Strongim jenda ikwaliti long Papua Niugini

AUSTRALIA Gavman wantaim Papua Niugini gavman i bin wokim wanpela wanbel toktok long dispela wik long wokim namba 2 hap bilong kantri plen bilong Pasifik Wimen's developmen wok.

Delilah Gore, I mekim luksave bilong dispela program taim tupela i sainim wanpela tok wanbel pepa insait long opis bilong Australia Hai Komisen long Pot Mosbi.

Namba 2 hap bilong Pasifik Wimen program i gat Aud\$ 55 milien long mekim wok insait long narapela 5-pela yia long strongim ol wok bilong jenda ikwaliti long PNG.

Mis Stokes i tok dispela hap bilong Pasifik Wimen i kamap as bilong wok bilong Australia long strongim jenda ikwaliti insait long PNG long mekim wankain wok we ol i bin statim pinis long yia 2012.

Hai Komisina bilong Australia, Deborah Stokes, na PNG Minista bilong Relijen, Yut na Komyuniti Developmen,

"Taim mipela i kamapim moa wok long mekim mani na long strongim lidasip bilong ol meri, em bai daunim pasin bi-

long paitim na bagarapim meri na ol yangpela gel, na tu mipela i ken helpim ol famili long i no ken stap rabis na ol bai stap seif na gat planti gutpela samting long PNG," em i tok.

Long wankain taim, Minista Gore i tok, "Dispela plen bai helpim mipela long karim aut ol plen bilong Gavman long Nesanel Polisi bilong Strongim ol Meri na Jenda Ikwaliti, we mipela i kamapim long 2011. Mipela i luksave olsem ol meri em namba wan lain long lukautim ol famili na long

kamapim gutpela ikonomi bilong kantri."

Tupela kantri bai strongim wok bung wantaim namel long ol gavman, non-gavman, praiwet sekta na ol komyuniti ogenaiesen long kamapim gutpela sindaun bilong ol bikpela meri na ol yangpela ol gel.

Namba wan Pasifik Wimen Papua Niugini Kantri Plen (2012-2014) i putim pinis Aud \$7.8 milien long mekim ol wok. Planti bilong ol dispela wok em i stap long namba wan plen pinis.



### Yut, Meri na Famili Pastor Barbara Lunge

#### Papua Niugini welkam long King Jisas

Nesen bilong PNG i tok welkam long King Jisas. Praim Minista, ol Gavman opisa, ol lida bilong Bodi bilong Kraus na ol pipel bilong Papua Niugini bai tok welkam long King Jisas long stap God bilong yumi oltaim, oltaim. (Phil 2:10-11). Olgeta manmeri bai brukim skru na olgeta maus bai i tokaut olsem Jisas em i Bikpela.

Ol lain bai putim retpela kapet long Jackson Ples balus long Mande 27 Epril wantaim 21 gan salut bilong Difens Fos. Olgeta sitizen i mas kamap long ples balus long moning taim long tok Welkam long King bilong Glori.

Olsem Buk Song 24:11 i tok, "Liptimapim het, yupela ol get; liptimapim het bilong yupela, ol dua bilong bipo tru, na larim king bilong glori baim kam insait. Husat dispela King bilong glori? Em i Bikpela God i strong tumas - em i King bilong glori.

Ol lain tim i kam bek long Amerika wantaim Olpela King James Baibel. Dispela baibel i bin stap 400 yia. Taim dispela baibel i stap long Yurop, em i bin kamap supa pawa long wol. Bihain dispela baibel i go long Amerika, em i kamap supa pawa.

Tasol nau dispela baibel i wok long kam lusim Amerika na kam long Pasifik long Papua Niugini. Bilong wanem God i lukluk tumas long PNG olsem. Em bikos olpela Praim Minista bilong kantri, Gren Sif Sir Michael Somare i bin sainim Tok Promis o Kavanen olsem PNG bai stap aninit long God bilong Israel. Em i bihainim tok i stap long buk sapta 8:10-12.

Taim yumi welkam long Tok bilong God i kam long nambis bilong PNG, em i minim olsem yumi tok welkam long God Papa, God Pikinini na God Holi Spirit. Ol tripela em i wanpela God tasol. John :1-4 i tok, "Bipo tru Tok i stap, na Tok em i stap wantaim God, na Tok em yet i God. Na Tok em i Lord Jisas husat i kamap man na i stap namel long yumi.

Dispela 400 krismas King James vesen baibel bai kam stap insait long haus palamen bilong Papua Niugini na em bai kamap as bilong gutpela sindaun na gutpela samting long kam long yumi ol manmeri nating bilong Papua Niugini.

God i redi long blesim yumi nau. Olsem na yumi mas redim bel bilong yumi, senisim tingting na pasin bilong yumi. Lusim ol pasin bilong bagarap bilong graun na tanim i go long God na bai yu lukim tru ol blesing bilong yu.



## Papua Niugini NESENEL AIDENTITI PROJEK



*Oi emu namo totona, Nesinol ID kadi oi abia*



# Pasport

▶ Eda tano bada lalonai: Oi emu kad do oi ia durua bema oi ura gabu aida oi lao eda tanobada lalonai

▶ Tanobada Haida: Oi emu kad do oi ia durua bema oi ura paspot bona visa abia ma lao gabu haida oi itaia tanobada ta ta dekenai.

**"Oi rejista hari bona oi noho lalonai"**

Nesenal Plening Dipatment

ese hereva ia mailaia







# PIH Saveman *Nias*

“I kam long Pacific International Hospital Port Moresby”

Ph: 311 3000/ Ph: 323 4400 Textline 7155 8866 Website: www.pih.com.pg

## Dokta stretim lewa wantaim stent tasol i no katim bodi

**Dokta Richard Chan, wanpela konsalten dokta bilong PIH em i save-man bilong stretim sik long lewa, (Intervention Cardiologist).**

Em i save stap long Cairns Australia na insait long olgeta tupela wik em i save kam long Pot Mosbi long Pasifik Intanesenel Haus sik long helpim ol lain husat i gat bikpela sik long lewa na long go long operesen.

Long de Epril 11 em i wokim tripela koroneri stent o operesen wantaim angioplasty long namba wan taim stret insait long PNG. Em i rausim ol rot blok insait long ol rop bilong kisim gutpela win i go long lewa bilong wanpela man wantaim wanpela liklik waia tiub i go insait na rausim ol blok. Bihain long tripela de em i pilim orait stret na em i go long haus.

I gat tupela nupela kain we nau PIH i ken givim long ol pablik sikman meri long PNG long namba wan taim stret em long angiogram na angioplasty.

Angiogram em i namba wan o “gold standet” long sekim lewa bilong yu long luksave long wanem bagarap i stap. Em i gutpela we long ol dokta bilong yu i ken lukim lewa bilong yu i wok long pam olsem wanem. Dokta bai subim wanpela liklik tiub, olsem liklik waia i go insait long han bilong yu. em bai ran i go insait long rop bilong blut na i go long lewa bilong yu. Taim em i kam klostu long lewa bilong yu, dispela waia bai sutim wanpela spesel ink i go insait long blut bilong yu.

Taim dispela wok i kamap long bodi bilong yu, em yu bai slip insait long wanpela bikpela masin i wok wankain olsem x-rei tasol em bai kisim vidio long wanem samting i stap insait long bodi bilong yu. em bai soim ran bilong dispela ink i go raun long bodi bilong yu. dispela ink bai soim wok lewa i pam olsem wanem. Em bai soim sapos i gat rot blok insait long ol rop bilong karim blut na win i go i kam long lewa. Dispela em ol dokta bai lukim klia stret long vidio skrin insait long cath lab.


Dispela kain operesen em taim dokta save salim wanpela ink i go insait long rop bilong han wantaim liklik waia tiub long soim ol blut no gut i pasim rop bilong lewa. Em i salim dispela marasin i go insait long tripela rop bilong lewa olgeta na putim wanpela kain spring insait long ol rop bilong karim blut (artery) na dispela i opim hap i blok na stap.



Dokta Chan holim sut bilong salim stent i wokim operesen tasol i no katim man. Em i sutim marasin na stet i go insait long han bilong sikman tasol.



Masin bilong wokim operesen long lewa nating na i no bilong katim man.



Makim rot bilong stent i go insait long rop na stretim rot blok insait.


Dispela ol i kolim 'non-invasive' bikos ol ba i no inap long opim olgeta lewa long stretim. Stent em i olsem waia spring we bai dokta i larim i stap insait long arteri o rop bilong karim blut.

Angioplasty em i wankain olsem Angiogram, we ol i save yusim dispela spesel waia tiub 'catheter', we i go insait long bodi bilong sikman. Tasol, Angioplasty em i wanpela we bilong stretim sik long lewa. Dispela tiub bai bringim wanpela samting olsem balun, ol i kolim long “stent”. Stent bai go long hap bi-

long bodi we ateri bilong yu i pas na stap.

Dispela kain operesen em Dr. Chan i bin kam long wokim long 11 Epril. Ol i tok olsem, nau yet em insait long bodi bilong wanpela man o meri i gat hevi long rop bilong blut, em bai ol i ken putim tripela o foapela stent long bodi bilong en.

Sapos rop bilong blut o arteri i pas olsem 70 pesen orait ol saveman dokta i tok, ol i mas wokim open hat sejeri we ol i opim lewa olgeta na stretim na ol i



Makim rot i go long rop bilong bodi soim blok i stap.

no ken yusim angioplasty.

Ol marasin bilong stretim sik long lewa, blut presa, sik suga, sik bilong planti gris tumas, em ol marasin olsem aspirin o Clopidogrel bilong mekim blut i go liklik, Beta Bloka bilong mekim lewa i pam isi liklik, Nitrates bilong rileksim ol arteri.

Em i tok olsem ol rot blok i save kamap long rop bilong karim win na blut em taim i gat planti gris tumas insait long ol arteri, na em i ken kamapim ol narapela bagarap olsem hai blut presa

na daiabitis o bikpela gris na pat tumas.

Long kisim gutpela sindaun, Dokta Chan i tok, ol pipel i mas traim long stopim smuk na no ken kaikai planti gris kaikai tumas. Yumi long PNG i mas kaikai moa prut na kumu bilong gaden.

Long Pasifik Intenesenel Haus sik, wanpela Coronary Angiogram em bai K10,000 tasol na long wokim wanpela Stenting bilong kliam rot long rop bilong win na blut wantaim angiogram em i 25,000 Kina o moa.

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal Intensive care

Get ready to deliver your next baby at the luxurious labor & delivery suite at the new PIH!



3Mile Hill, Taurama Rd, Port Moresby \* Call 311-3000 or 323-4400 or text 7155-8866 or email: pihopd@gmail.com

# Katolik Bisop Konprens harim tok bilong Nuncio

KATOLIK Bisop Konprens (CBC) bilong Papua Niugini na Solomon Ailan i bin holim enuel jeneral miting bilong ol long dispela wik we bai pinis tude.

Long Sarere 18 Epril, ol bisop na Asbisop i bin harim toktok bilong Asbisop Michael W. Banach, husat em i Apostolik Nuncio, i makim opis bilong Pop long Papua Niugini na Solomon Ailan.

Asbisop Banach em i bringim toktok bilong Pop Francis, het bilong Katolik Sios olsem dispela yia 2015 em i yia bilong wok marimari.

Em i bringim toktok bilong Pop i kam long ol bisop bilong PNG na Solomon Ailan olsem, taim em i bin bungim Pop Francis long yia i go pinis, Pop i bin salim gutbel toktok long ol.

"Mi bin bungim Pop Francis long yia i go pinis na em i tokim mi long tokim yupela olsem, yupela i no stap yupela yet long mekim ol strongpela wok misin bilong yupela long helpim ol

pipel, skulim ol long Gospel na long mekim wok bilong Sios long PNG." Asbisop Banach i tok.

Em i tokaut olsem 2016 Wol Yut Dei bai kamap long Krakow, Polan long 25 i go 31 Julai. Bikpela tingting bilong Wol Yut Dei em bai 'Ol manmeri bel bilong ol i klin, em ol i ken amamas. Bai ol i lukim God," Matyu 5:8.

Wanpela bikpela toktok Nuncio i wokim em long dispela yia em i yia bilong 'Yumi kisim Marimari'.

Em i tok olsem long namba tu sande bilong Ista o Divine Mercy, Pop Francis i bin tokaut long "Ekstraodineri Jubili bilong Marimari' Holi Yia. Dispela yia bai stat long Desemba 8 taim ol Holi Dua i op long Basilica bilong Santu Pita na em bai pinis long 20 Novemba 2016.

**Apostolic Nuncio, Asbisop, Michael W. Banach i toktok long ol Katolik Bisop bilong Papua Niugini na Solomon Ailans.**



## Palamen i no ken paul

NIUSPEPA bilong las wik Fraide na dispela wik i toktok long Spika Theo Zurenuoc i bin holim wanpela Kruzet long go pas long ol pasto na ol hai pawa Palamenteri deligesen bai go long Amerika long bringim i kam 400 yia King James Baibel.

As bilong dispela wok i min olsem long kamapim nupela lukluk long bilasim aninit long Nesanel Yuniti na Aidentiti Project.

Dispela em i wanpela gutpela wok we Spika bilong Palamen i laik kamapim na em bai bringim bikpela na gutpela samting long Palamen na long ol memba.

Dispela kain wok Zurenuoc i wok long mekim i luk olsem wanpela kalt wok insait long Palamen Haus.

Sapos yumi glasim gut tru, Baibel em Tok bilong God na God em i no nupela God long PNG.

Em i bin stap hia pinis bipo kriesin na ol misinari i kam na inapim olgeta tok i stap long Buk tambu long yumi.

Ol tumbuna misinari i hat wok no gut tru long autim Gut Nius bilong Jisas Krai i kam inap nau na yumi ol pris na pasts tu i wok long surukim yet wok bilong Jisas Krai, tasol yumi lida na pipel yet i wok long givim baksait long dispela Baibel.

Nau Spika na ol lain bilong em i laik kisim KJV Baibel i kam long PNG.

Olsem wanem, ol misinari i givim yumi bun tasol, olsem na yumi painim gutpela mit long USA?

Yumi i no gat Baibel long PNG?

Ol misinari i no bin autim tok bilong God na yumi ol sios lida ino surukim yet long autim Gut Nius?

Tru, ol bikpela mama sios i bin istap pinis hia long PNG moa long handed yias na KJV Baibel tu i stap pinis wankain namba olsem tu na ol i sanapim faundesin pinis long dispela kantri PNG.

Baibel tasol i mekim yumi kamap kristen na Tok bilong em tasol i holim yumi.

PNG em i no Muslem o wanpela haidden kantri, na watpo Spika na ol ai pas lain i mekim dispela kain wok?

Watpo ol i laik bagarapim nem bilong God long Palamen haus?

Watpo ol pasto na ol foren edvaisa i givim rong edvais long PNG?

Watpo Spika ino inap sindaun na kisim gutpela tingting long ol elda long ol sios pastaim?

Yumi pipel bilong dispela kantri i luksave pinis olsem PNG em wanpela korap kantri long wol na dispela bikpela stil pasin i stap stret long namel bilong Palamen haus.

Watpo dispela gras no gut i stap yet long namel bilong Palamen na yumi laik bilasim God antap long skin tasol.

Tinging, Baibel i no pilai samting. Baibel em i Holi Buk, em i tok bilong God na yumi yusim wantaim rispek.

## Ol papa bilong sios grup i blesim konstitusen bilong grup



Grup Seketeri Peter Oa (namba 3 long hankais) i ritim toktok bilong mekim wok, na Siaman James Tari i holim pepa na redi long givim i go long pater bai blesim na komisenim.

OL papa grup bilong Sen Paul Peris long Gerehu Stes 6 i bin bringim konstitusen bilong ol long Pater i blesim long Ista Misa long Sande, stat bilong dispela mun.

Em i namba wan taim long dispela peris long wanpela sios grup olsem dispela Papa Grup mekim long i komisenim konstitusen o mama lo bilong ol.

"Mipela i makim olgeta papa bilong Sen Paul Peris long Gerehu Stes 6 na mipela i kam givim mipela yet long olgeta komyuniti," Seketeri, Peter Oa i tok taim em i givim ol pepa i go long Peris Pris, Pater John Romi long blesim.

"Taim mipela i mekim olsem, mipela i luksave long ol lo bilong bihainim we i stap insait longkamap bi-

long dispela grup long ranim ol progam na wok bilong en insait long helpim bilong mipela i go long Sios," Seketeri Peter Oa i tok.

Ol papa i tok promis long sapatim na mekim wok bilong kongrisgesen long mekim wok olsem Konstitusen bilong ol na misin na visen bilong ol i tok.

Bihain ol i salim ol pepa bilong konstitusen long han bilong ol olpela man i go daun long ol yangpela man bihain ol i givim i go long peris pris.

Taim ol i givim konstitusen pepa olsem, i bilong soim olsem wok bilong dispela grup bai go het yet long ol olpela papa i go long ol yangpela papa long kam insait long karim wok bilong sios na grup na konstitusen bilong

## Papagraun long KBK bai dediketim main go long Papa God

**James G.Kila i raitim**

WANPELA bikpela sios bung bai kamap long Kurumbukari Main long Usino-Bundi distrik long Me 1, 2015 we ol Kristen Sios bai beten na dediketim Ramu nikel/kobalt main i go long Papa God.

Dispela em histori stret na wanpela narakain samting tru ol lain Kristen bilipman meri bilong Kurumbukari bai wokim long dispela taim na em namba wan taim tru we i lukim ol papagraun bilong wanpela maining projek long PNG i beten na givim wok bilong maining i go long han bilong Papa God.

Siaman bilong Kurumbukari Spiritual Dvelopmen Faundesin (KSDF), Pastor Michael Yori i tokaut olsem olgeta lain klen na papagraun i wanbel na bai bung long Me 1, 2015 long dediketim o prea long putim wok bilong maining i go long han bilong Papa God.

KSDF em wanpela ambrela ogenaesisin long Kurumbukari eria we i lukautim wok-bung namel long olgeta Kristen Sios i stap long hap. Ol sios husat i stap insait long KSDF olsem memba em Katolik Sios, Luteran, Seven De Adventis, ol arapela Pentekostol Sios long eria.

Pastor Michael i tok olsem em i salim toksave na invitesin i go pinis long menesmen bilong KBK Main em Ramu NiCo Menesmen (MCC) Limited, na ol main menesmen i givim tok-orait long dispela seremoni bai kamap long Me 1.

Em i tok tu olsem planti ol lain bikman bilong distrik na tu ol lain long MRA Projek Kodineta bai stap long dispela bikpela kruseid na dedikesen.

"Mipela bai lukim bikpela kruseid na progrem bilong dedikesen bai kamap long Me 1, 2015 na ples mipela bai wokim beten em long KBK Main sait eria," Pastor Michael i tok.

Em i tok dispela dedikesen bilong KBK Main em i stap insait long wanpela bikpela kombain Kristen sios kruseid we bai stap long Epril 27 i go inap long Me 3 we olgeta Kristen Sios bai bung long mekim lotu, serim tok bilong Papa God na singsing na preisim nem bilong Papa God

Pastor Michael i stori olsem dispela kruseid long KBK em i kamap bihainim propesi bilong wanpela Propet nem bilong em Enoch Takai, husat i bin tokaut long wanpela driman na propesi long 2003 olsem developmen bilong dispela nikel projek long KBK em ol lain bilong Esia bai developim.



# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)



Piksa blong meri i kisim hevi long domestik vailens long PNG. Foto: ABC

## Me'ekamui i stopim ABG i mekim ileksen

OL lain bilong Me'ekamui long Kono Saut Bogenvil i bin stopim ol kendidet bilong Atonomas Bogenvil Gavman (ABG) long go kempen long hap bilong ol.

Aloysius Laukai bosman bilong New Dawn FM long Bogenvil i tok ol lain bilong Me'ekamui long Kono Saut Bogenvil i bin stopim ol kendidet na New Dawn FM i wok long traim painim aut moa long dispela stori.

Em i tok ol Me'ekamui i no tokaut long wanem samting tru i mekim ol i stopim ol kendidet long karimaut ol kempen bilong ol.

Atonomas rijon bilong Bogenvil bai holim ol ABG presiden na palamen ileksen stat long neks mun Me 11.

Mista Laukai i tok ol nau ol sif i wok long toktok wantaim ol Me'ekamui komanda long larim ol pipel long komyuniti i vot.

## Ol meri PNG i mas stap seif

WANPELA humen raits ektivis bilong Papua New Guinea i wokim strongpela toktok long mekim sindaun bilong ol meri long kantri i seif.

Ruth Kissam em kodineta bilong ol yangpela pipel long Westen Hailans Provins i tok gavman bilong Papua New Guinea na lain bilong Nesenel Kaunsel bilong ol Meri i mas wokbung long kamapim ol seif ples bilong ol meri we i save bungim vailens long laip bilong ol.

Dispela em i askim bilong Mis Kissam long ol meri long Hailans rijon we planti meri i save dai o kisim bagarap long wanem, ol i save sutim tok long ol olsem ol posin meri o ol sosera.

Mis Kissam i tok wari bilong kilim ol meri long sutim tok long kilim man long soseri em i wanpela bikpela hevi nau long Hailans.

Olsem na em i tok bai gutpela sapos gavman i ken helpim Nesenel Kaunsel bilong ol Meri long putim ol gutpela ples we ol meri i ken go na stap gut long en.

## Gavman bilong Papua New Guinea i mas

## bringim bek ol laibreri

Gavman bilong Papua New Guinea i mas bringim bek ol laibreri long ol wanwan provins long helpim ol skul pikinini wantaim edukesen bilong ol.

Wanpela mama bilong PNG husat i save stap long Melbourne, Elvie Rowe, i bin mekim dispela askim bihain long lain bilong Buk Bilong Ol Pikinini i bin lonsim tupela nupela buk tripela wik i go pinis.

Ol i kolim ol dispela nupela buk long "Our Village: Tatana Island" na "Buk bilong Koki Market".

Misis Rowe i tok PNG i bin gat planti laibreri bipo, tasol planti long ol dispela sevis i bin pas bihain long indipendens.

Wanpela meri bilong Australia, Anne-Sophie Hermann i bin statim dispela Buk bilong ol pikinini projek taim em i bin stap wantaim man bilong en husat i bin Hai Komisina bilong Australian long PNG long yia 2007.

## PNG Gavman i no ken taitim sosel midia

GAVMAN bilong Papua New Guinea i no ken tingting long strongim ol lo egensim sosel media long wanem, dispela bai daunim midia fridom long kantri.

Martyn Namorong, wanpela sosel midia saveman bilong PNG i tok bihainim ol nius ripot olsem gavman i laik taitim ol lo egensim sosel midia olsem Facebook na Twitter.

Em i tok sosel midia i wanpla rot ol pipel i ken bihainim na luksave long ol hevi i wok long kamap long gavman olsem korapsen.

Mista Namorong i tok sosel midia i wanpela kain samting we i wok long pulim planti handet tause PNG pipel na sapos gavman i kamapim dispela lo, em bai kamapim hevi long demokretik rait bilong ol.

## Vanuatu yut i helpim pipel bihainim Saiklon Pam

OL lain bilong Vanuatu Nesenel Yut Kaunsel nau i wok long helpim ol yangpela pikinini na ol narapela pipel bihainim ol bikpela bagarap em Saiklon Pam i bin kamapim long mun i go pinis.

Joe Kalo em edminstreta bilong Vanuatu Nesenel Yut Kaunsel long Port Vila i tok ol dispela yangpela pipel i save helpim ol pipel long kain hevi olsem i gat ol bikpela wari long het, na ol pikinini husat i bin lukim dispela taim no gut na ol i gat wari long het bilong ol tu.

Ol i mekim dispela wok bihainim sampela trening ol i bin kisim long Port Vila long wik i go pinis.

Saiklon Pam i bin hamarim klostu olgeta 6-pela provins long kantri.

Mista Kalo i tokim Redio Australia olsem ol dispela yangpela pipel i amamas long givim sevis bilong ol i go long komyuniti.

## PNG Open Palamen ripot bai aut

LAIN bilong Transperensi Intanesenel PNG (TIPNG) klostu nau bai autim wanpela ripot long ol wok bilong PNG Nesenel Palamen.

Ol i kolim dispela wok bilong ol long "Open Parliament Project" na em i karamapim ol wok em ol Palamen memba yet i save mekim taim ol i stap long Palamen, na tu, ol samting olsem ol politkel pati na planti ol narapla samting tu.

Ol i tok as tingting bilong dispela projek em bilong tok klia long ol pipel long wanem samting ol memba bilong ol i save mekim taim ol i stap long Palamen.

Planti taim ol pipel i save votim ol memba long sanap makim ol long Palamen, tasol ol i no save wanem kain wok tru ol dispela memba i save mekim taim ol i stap long Palamen.

Papua New Guinea Palamen i gat 111 ol sia.

## PNG mekim planti wok pinis long stopim korapsen: Dokta Ken Nganga

BOSMAN bilong Fainens Dipatmen i tok gavman i go het long wokim planti wok pinis long daunim sait long korapsen we ol intenesenel ejensi i tok em i wanpela korap kantri stret long wol.

Dokta Ken Nganga em Eking Seketeri bilong Fainens Dipatmen long PNG i tok ol developmen patna long na arapela kantri i

mas luksave long bikpela piksa olsem, PNG i wok tru tru long dil wantaim ol isu bilong korapsen long kantri.

Dokta Ngangan i tok i gat ol wok i go het pinis insait long gavman sistem long stopim ol pasin bilong korapsen we i bikpela insait long gavman.

Dokta Ngangan i tok moa long dispela Independent Commission Against Corruption o ICAC we O'Neill gavman i wok long kirapim.

Em i tok hap bilong dispela pait egen-sim korapsen we i go het pinis em dispela Phones Against Corruption we dipartment i wok wantaim UN Development Program long en.

Dokta Ngangan i tok ol i amamas long rot we dispela sistem bilong ripotim hait ol opisa long gavman husat i stilim mani i go het.

Em i tok dispela sistem i mekim planti opisa husat i laik stilim mani long tingting gut pastaim long wokim kain korap pasin olsem.

## Ol famili memba i bungim hevi yet bihain long Rabaul Queen birua

LONG Papua New Guinea, planti famili na pipal husat i bin lusim ol pikinini na famili memba bihainim birua bilong pasindia sip, Rabaul Queen, long 2013 nau i wok long bungim bikpela hevi long helt bilong ol.

Celine Yep em memba bilong Rabaul Queen Disasta Komiti long PNG i sampela nau i gat sik long het o ol i go longlong taim ol narapela i save kros tumas na kamapim trabel nabaut.

Celine Yep wantem man bilong en Tommy Yep, em Siaman bilong Rabaul Queen Disasta Komiti i bin statim wanpela klas eksen egensim papa bilong Rabaul Queen, Peter Sharp i mekim dispela toktok.

Misis Yep i mekim dispela toktok taim Nesenel Kot i redi long harim ol sas egensim papa bilong kampani, Peter Sharp na tripela narapela pipel long wik bihain.

Rabaul Queen i bin wok long karim moa long 300 pasindia taim em i bin kapsait na kilim 171 pipel klostu long Morobe provins long mun Februari, 2013.

# Ol pablik i mas gat rot bilong kotim ol kauboï draiva bilong ol PMV



NAMBA bilong ol manmeri i dai long ol eksiden long rot long PNG i wok long surik i go antap long olgeta yia. Las wik i bin gat wanpela bikpela birua long rot long Jiwaka we 14 pipel i dai. Bas ol i bin pasindia long en i kapsait i go daun long wara na ol i dai.

Long 2010 tupela bas i bin bam long Hailans Haiwe na 74 pasindia i dai. Long 2013, ol 28 pasindia i bin dai long wanpela eksiden long Baiya Riva, Westen Hailans. I bin gat narapela bikpela kain eksiden olsem long Sepik Haiwe na long Bereina, Sentral Provins we planti pasindia i bin dai.


Dispela kain ol eksiden long rot we planti moa manmeri i dai i mekim planti pipel i tingting planti. Sampela i tok PNG i wanpela kantri we i no seif long raun long ol PMV long ol longpela rot.

Planti bilong ol dispela eksiden i save kamap long taim draiva i spit tumas, o kar i bagarap, o draiva i spak, o ol draiva i no malolo na i aislip na kamapim eksiden.

Nupela Rot Trefik Atorti (RTA) i tokaut bai ol i givim bikpela mekimsave long ol draiva na papa bilong ol PMV. Ol draiva husat i kamapim eksiden we ol man i dai bai baim K60,000 fain na i go kalabus. RTA i tokaut tu olsem bai ol i sasim ol papa bilong ol PMV tu.

Wanpela ripot bilong Rot Sefti Kaunsil bilong 2001 -2011 i tokaut olsem i bin gat 27,903 pipel i dai long ol eksiden long rot. Na long dispela namba, 12,541 i bin dai long Hailans rijon na long Sauten rijon 8,147 pipel i bin dai.

Dispela ripot i tok long ol eksiden i kamap long rot long Westen Hailans, long Minz eria, 75 pesen



em ol PMV bas, 11 pesen ol praivet kar, 6 pesen ol kampani kar na 3 pesen ol arapela. Ripot i tok tu olsem long las 10-pela yia, pasin bilong spak na draiv i kamapim planti eksiden we ol pipel i dai long Jiwaka (Minz rot)

na long Westen Hailans. Dispela kain ripot bilong Rot Sefti Atoriti i soim olsem i gat mas gat moa kontrol long ol PMV na ol draiva husat i karim ol pasindia. Sasim ol draiva long bikpela fain na kalabusim ol, bai i daunim mak

bilong ol pipel i dai long eksiden. Tasol i mas gat moa kontrol long ol arapela samting tu. Ol PMV i mas gat sekap long kondisen bilong bas o trak bihain long tripela mun na kisim sefti stika. Mekim olsem bai papa bilong PMV na

draiva tu i ken klia long kondisen bilong bas o trak long taim ol i karim pasindia. Pasin bilong sekap long rekot bilong draiva tu i bikpela wok.

Draiva i mas kisim laisen long stretpela rot na i no hait na kisim. Em i mas gat gutpela rekot we i no bin bamim kar o kamapim sampela birua long rot bipo.

Ol toktok bilong givim bikpela moa mekim save long ol draiva na papa bilong ol PMV em wok bilong Transpot Atoriti, ol polis na ol kot bilong kantri.

Tasol bikpela samting em long banisim raits bilong ol pablik husat i save kalap long ol dispela PMV bikos ol i no gat narapela transpot. Ol pablik i ken mekim wanem long stopim ol draiva long kamapim ol eksiden?

Wanpela rot bilong stopim ol kauboï draiva long holim stia bilong PMV em long givim mobail namba bilong Rot Transpot Atoriti o trefik seksen bilong Polis we ol pablik i ken ring o salim teks na tok save long spak draiva o draiva i spit tumas o i mekim samting we i ken kamapim eksiden na kilim ol pasindia.

Olgeta yia gavman i save kisim planti milien Kina tru long insurens bilong ol kar na trak. Ating MVIL na Rot Transpot Atoriti i ken yusim sampela bilong dispela mani long sanapim wanpela rot we ol pablik i ken putim ripot.

Tude i gat teknoloji i ken mekim pasin bilong sekap long ol kar i isi tru. Yumi mekim olsem bai ol rot na ol PMV tu i seif na yumi banisim laip bilong ol manmeri na pikinini long PNG.

# Ol longtaim polis bai muv long nupela haus

Esther Bralyn Wani i raitim

“OL polis bai i kisim haus long poin sistem na i no long wantok sistem,” Polis Komisina Geoffrey Vaki i tokim ol pipel long Gordon Polis Bareks long dispela wik Tunde.

Em i tok taim planti famili i stap longpela taim long wanpela hap tasol olsem Gordon Polis Bareks husat i gat sans long muv i go aut long nupela polis bareks long Not Waigani.

Ol haus long Gordons Polis Bareks i bagarap o olupela pinis na ol toilet i blok na em i no helti o gutpela long ol polis i slip long hap.

Mista Vaki i tok ol famili i mas klinim eria bilong ol na no ken yusim niuspepa o ol narapela samting olsem tisu long toilet long wanem, dispela em ol sampela as we toilet i blok o bagarap.

Em i salensim ol polis na ol famili bilong ol olsem em yet i save slip long haus i bruk na bagarap pinis tasol em i save tokim ol famili bilong em long



Piksa i soim longtaim na olupela haus bilong ol yangpela manmeri tasol nau i pulap long ol wantok tu.

klinim na mekim eria i luk olsem wanpela polis man i

save long lo i slip long hap. Em i tok sapos em i ken

mekim, ol tu i ken.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg Websait: www.wantokniuspepa.com

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# League Bilong Laif program i stat long Bogenvil

**LIG bilong Laif program em i go nau long namba 4 rijon long Papua Niugini.**

Program bilong skul ragbi lig i stat long Atonomas Rijon bilong Bogenvil long dispela mun. Lig bilong Laif em i wanpela program we Australia i yusim ragbi lig spot long strongim ol edukesen bilong ol pikinini.

Australia Gavman i wok wantaim Nesenel Ragbi Lig

(Australia) long patna wantaim PNG Nesenel Dipatmen bilong Edukesen na Bogenvil Dipatmen bilong Edukesen.

Long wik i go pinis, ol NRL developmen opisa i go long Buka na bai ol i wok wantaim 950 sumatin insait long tupela skul – Lonahan na Malasang Praimeri Skul.

Wanwan klas bai kisim 5-pela taim long skul long pilai

graun na insait long klasrum tu we ol sumatin bai i no inap long pilai tru na resis. Dispela program em bilong ol pikinini man na meri wantaim.

Australia Hai Komisina Deborah Stokes i tok, "dispela program i save sapotim ol yangpela man na meri bilong Bogenvil. Em i gutpela wei bilong strongim save na pasin bilong wok bung wantaim."

Lig bilong Laif i

trenim pinis 25 praimer i skul tisa long Buka long we bilong ranim dispela program. Moa tisa bai kisim trening yet.

Program i save yusim ol toktok bilong ragbi lig long lainim rit we M a c m i l l a n Edukesen Australia i kamapim na em i save strongim helti laip stail na em i givim moa strong long ol sumatin long pilai, na lainim rit, rait na matematik.



Ol pikinini bilong Malasang Praimeri Skul, Buka, i pilai long taim bilong lonsim Lig bilong Laif.

# Moa long 1,600 tisa long Madang no kisim pe las potnait

**MOA long 1,600 tisa long Madang provins long las wik i no kisim potnait pe bilong ol bihain long kompiyuta masin bilong Nesenel Edukesen Dipatmen i rausim nem bilong ol long salari o perol bilong gavman.**

Ol tisa i no amamas long dispela na i bringim belhevi na kros i go long Madang Provinsal Edukesen opis long Jomba na i sindaun autsait long opis na laikim ol atoriti i tok stret long ol watpo dispela i kamap.

Ol tisa husat i no kisim pei we ol lain long elementeri, praimer na tu sekederi skul insait long Madang provins.

Long las wik Fonde ol tisa ya i bringim belhevi bilong ol i go long Madang PEB na sutim tok long appointing opisa na tu ol het-tisa na ol arapela lain husat i no wokim stret wok long stretim ol duti risamsen fom bilong ol tisa na salim pastaim long taim stret i go long Nesenel Edukesen Dipatmen salari opis long Mosbi.

Planti ol dispela tisa i sutim tok long Madang provinsal edukesen advaisa wantaim appointing opisa, ol het-tisa na tu ol bod bilong wan wan skul long givim ol dispela hevi.

Wanpela tisa bilong rural skul



Ol tisa i bung ausait long Madang provinsal edukesen opis bikos ol no kisim potnait pe long las wik.

long Madang, husat i no laik long kolim nem bilong em i tok olsem em wantaim femili bilong em i kam long Madang taun long kisim sampela skul saplai na kaikai bilong ol long go bek long Simbai taim em i bungim dispela hevi.

"Long Trinde morning mi wantaim meri bilong mi go long

Madang taun na wok long wetim 'BSP alert' long mobail fon blong mi, tasol em i no kamap i go inap apinun na mi wari stret bikos long Fonde mipela bai go bek," tisa ya i tok.

Wankain hevi tu em ol arapela tisa i bungim na long las wik Fonde olgeta i pulim lain i go long

Madang provinsal Edukesen opis long rausim bel-hevi bilong ol.

Ol tisa ya i no amamas long ol wokman bilong Edukesen opis bikos ol opisa i no bringim ol duti risamsen fom i go hariap long Mosbi long rejistarim nem bilong ol tisa long salari o pei-rol bilong Nesenel Edukesen Dipatmen.

Long las wik Fonde, ol tisa i kros tru na i tokaut olsem ol bai no inap go tis long klasrum inap ol i lukim pei bilong ol i go long akaunt bilong ol.

Sampela tisa bilong ol rurel praimer i skul long Midel-Ramu, Usino-Bundi na Raikos nau i stap long Madang taun na wetim tasol wanem taim pe bilong ol go insait na ol bai go bek long skul bilong ol.

Wanpela Madang Provinsal Edukesen opisa i tokaut olsem dispela asua i no stap long appointing opisa, em asua bilong ol het-tisa na bod bilong skul na tu sampela asua i stap long ol wok lain bilong salaris long Madang provinsal edukesen opis.

Em i tok ol wokmeri bilong Madang provinsal Edukesen salari ofis i wok long abrusim appointing opisa na i wok long putim nem bilong ol tisa long ol skul nating na dispela i no stap long rekot bilong appointing opisa.

Stat long las wik Fonde ol tisa i wok long pulmapim ol duti risamsen fom na givim i go long appointing opisa na ol het-tisa long stretim bilong ol long redim long ol i mas go bek long pei-rol.

Long dispela taim planti ol tisa i no go long skul long tis bikos ol i no kisim pei, na ol sumatin long skul i no lainim samting.

## Helt Senta kisim nupela kar

**Tony Sapan i raitim**

**MINEREL** Risos Lihir Limitet i redi long helpim Nimamar Spesel Papas Atoriti olsem draiva bilong kar bilong givim sevis insait long developmen bilong maining ailan bilong Lihir bos, Lawrence Rausim i tok.

Em i mekim toktok pastaim long em i givim nupela ten sita kar i go long Palle Helt Senta em Lotu Katolik i ranim. Mista Rausim i tok wok long givim sevis em wok bilong gavman

na MRL i no inap kisim, tasol bai i wok wantaim em long helpim ol pipel long ailan.

Em i tok ol sevis long ailan i bagarap bikos i no gat wok bung namel long ol lain i givim sevis na i singaut long gutpela wok bung wantaim namel long ol long strongim na mekim gut dispela wok.

Bos bilong MRL i tok i gat nid long NSPA long kamaut kliia wantaim ol polisi na plen bilong em bilong developmen olsem bai ol lain i

save givim sevis olsem MRL i ken lukim we ol i ken helpim long strongim na mekim gut wok bilong givim sevis na i no ken mekim wok ol i mekim pinis.

Pater Sela bilong Sen Clement Paris bilong Lihir i tok tenkyu long MRL long helpim wantaim nupela kar na i tok i tru em i bin kisim sampela taim long helt senta long kisim nupela kar taim ol i yusim long wetim, i karim kaikai.

Sista i go pas long Palle Helta Senta, Sr. Sophie Alip i tok

stat yet long taim helt senta i bin op i no bin gat bikpela wok i kamap long wokim gut wantaim ol narapela hap bilong en.

Alip i tok em i ting helpim bilong MRL wantaim nupela edministresen kar bai i go het na i tok helt senta bai i stap bihain long Lihir Main i pas long helpim ol pipel long ailan.

Pater Sela na Sista Alip i tok bai Paris na Helt Senta i helpim long lukautim dispela edministresen kar em MRL i baim bilong ol.

## Papa graun askim long helpim

**Tony Sapan i raitim**

OL papa graun long Wes kos Niu Ailan wantaim ol ailan i stap insait long hap solwara 1 projek bai i kamap long en i singaut long Nesenel gavman long givim ol helpim long K150 milien.

Presiden bipo bilong Sentrel Niu Ailan Lokel level gavman, mista Soka Toligai taim i mekim dispela askim, i tok dispela helpim i mas kamapim ol nara-

pela Solwara 1 projek eria insait long ol narapela provins long Bismak Si.

Mista Toligai i tok ol pipel stat long Lambom long sauten Niu Ailan i go long Kavin long poin bilong Kavieng, ol pipel bilong Duke Of York Ailan insait long Is Nu Briten na pipel bilong Djaul Ailan long wes kos bilong Kavieng i mas kisim dispela helpim.

Em i tok ol pipel insait long dispela eria laikim nesenel gavman long givim dispela helpim insait long tripela

yia wantaim K50 milien long wan wan yia long bai wok bilong ol rot na bris, ol hap bilong givim sevis na hap i go long wok didiman long kamapim kakao na kopra na sampela kain royalty mani ol i baim i go long ol famili insait long hap dispela projek bai i wok long en.

Plisman bipo na siaman bilong provinsal Lika Laisens Bod i singaut long Namatanai Distrik Developmen Atoriti,

ol presiden bilong LLG insait long NTI Distrik na memba bilong NTI mista Byron Chan long papa long dispela helpim.

Em laik bai NDDA i baim kos bilong raitim tok orait long dispela helpim wantaim helpim bilong MRA LTD na Petromin LTD na ol loya bilong gavman long givim helpim long raitim tok orait long K150 milien helpim i go long ol pipel insait long hap dispela projek bai i kamap long en.

# Australia i harim Krai bilong ol pipel kisim taim long Saiklon Guba



Australia Hai Komisina, Debora Stoke, Gavana bilong Oro, Garry Juffa na Seketeri bilong Trensport Roy Mumu na Seketeri bilong Woks, David Vere i brukim graun long Kamusi long makim wok bilong 4-pela nupela bris.



Dispela em long Kamusi rot i go long Kokoda, we Saiklon Guba i bin bagarapim bris. Nupela 285 mita bris bai kamap. Em bai longpela dabol len bris stret insait long kantri.



No gat bris, ol kar i save brukim wara na taim bilong ren, wara i save tait olsem dispela piksa i soim long en.



Ol ples lain i redi long givim gif long Australia Hai Komisina, Deborah Stokes, long soim amamas bilong ol long Australia gavman.

*Ol poto: Stanley Nondol*

### Stanley Nondol i raitim

#### AUSTRALIA gavman i saptim Papua Niugini yet long ol kaikain developmen long kirapim kantri.

Las wik i lukim Australia gavman i tokaut olsem em i putim moa long K139 milien long stretim 4-pela bris long Oro provins we Saiklon Guba i bagarapim long yia 2007.

Long Oro i gat planti bikpela wara na planti bris i stap namel long ol rot long provins. Long 2007, Saiklon Guba i bagarapim planti bris na ol gaden kaikai na ol planti propeti long hap.

Bikpela samting long helpim laip bilong ol pipel em ol "bris". Em i joinim bikpela populesen i go long ol skul, haus sik, taun, maket, ples balus, polis stesen na ol arapela besik sevis.

Taim mipela i go long Oro las wik, mipela i lukim olsem laip bilong planti tausen manmeri na pikinini i bin hat long las 7-pela yia bihain long Saiklon Guba i bin bagarapim ples.

Nau i no gat bris long planti bikpela wara. Ol PMV kar na ol arapela kar i brukim bikpela wara olsem Eroro na Kamusi, Ambago long kisim ol pasindia na kago i go long narapela sait. Tasol long taim bilong bikpela ren na taitwara, trenspot sistem long hap i kat of na i mekim laip i go hat olgeta.

Ol sampela hevi ol pipel long hap i bungim long 7-pela yia na i bungim yet bihain long saiklon Guba em; planti pikini i no go skul gut, planti sik manmeri na pikinini i no go long haus sik, ol trenspot i les long opret bikos ol bai katim ol bikpela wara. Ol mama papa i painim hat long kisim ol gaden samting i kam salim long maket na mekim mani long baim skul fi, na ol arapela nid bilong famil.

Na tu ol papa bilong trenspot i apim trenspot fi bikos kos bilong fiul go antap, na ol i wari long kar bilong ol i ken bagarap. No gat planti PMV go long ol ples.

Ol bris i bagarap em em long Kokoda Haiwe we Australia gavman olgeta yia i save go long Kokoda long tingim ol soldai

bilong en i pait long Kokoda wantaim ol soldai bilong Japan long Wol Woa 2.

Las wik Fonde, ol pipel long hap i kisim gutnius olsem dispela hevi bai pinis wantaim K139.4 milien mani bilong ol pipel na gavman bilong Australia i redi long helpim bildim ol nupela bris.

Dipatmen bilong Woks na Trensport na Australia-PNG Trensport Sektorel Program (TSSP) i wok bung wantaim na lukim gavman bilong PNG na Australia i kamap wantaim K139.4 milien.

Australia gavman i tok orait long putim bikpela mani long Oro long bildim gen ol dispela bris bihain long ol mama, pikinini na ol pipel bilong Oro i rausim ai wara na tokim Australia olsem laip bilong ol i hat long planti sevis olsem helt, edukesen na mekim inkamo mani bikos rot na ol bris i bagarap olgeta.

Seketeri bilong Woks, David Vere na Australia Hai Komisina long PNG, Deborah Stoke i tokim ol pipel long Oro olsem ol 4-pela bris bai no inap pundaun na bagarap long taim bilong Naturel disasta olsem

saiklon. Ol bai sanap moa long ol handret yia i kam.

Dispela wok i wok i stat na olgeta bris bai pinis long mun Jun neks yia.

Wanpela bilong dispela ol bris em Kamusi bris. Em bai wanpela longpela 2-len bris long kantri na longpela bilong em i 285 mita.

Sapos Australia gavman i no helpim, ol pipel long Oro bai kisim taim yet bikos K139 milien em bikpela mani tumas. Na em i winim provinsal baset bilong Oro.

Sapos Nesenel gavman i laik wokim bai lusim ol wok long narapela sekta.

Em i bin kisim 7-pela yia olgeta. Na mi lukim laip long hap em bin hat stret long ol pipel. Planti taim ol memba bilong Oro provins i save pait hat long Palamen na singaut long nesenel gavman long bildim gen ol bris saiklon Guba i bagarapim. Tasol ol i no kisim wanpela gutpela ansa ikam inap las wik.

Ol pipel bilong Oro i tok tenkyu long Australia Hai Komisina, Deborah Stoke, na givim sampela gif long soim amamas long pasin tumbuna bilong ol.

# Stori bilong tumbuna

## Raun wantaim Wantok kru ...

### Namba 11 Yumi FM music awod wantaim stail



## Tewel paullm susa

Wanpela yangpela man nem bilong em Lyaillelya na nem bilong susa bilong em Tapieda Ipali. Tupela i sindann long ples ol i kolim Gulipyanda. Pas bilong tupela i wankain tru. Wanpela taim man ya i tokim susa bilong em olsem, nau i gutpela taim na mi go painim abus long bus, yu stap long haus. Tasol susa i tok mi wanpela i no laik stap long haus. Mi laik kam wantaim yu. Brata i tokim susa, yu pret long husat? Yu mas stap long haus. Em i tokim susa olsem na brata i go painim abus long bus.

Yangpela meri ya i stap long haus bilong tupela.

Wanpela tewel man i tanim olsem brata bilong em na karim abus i kam long haus. Tewel man i singaut long yangpela meri olsem susa, susa, mi kam pinis. Yu kam na lukim abus mi kilim long en. Na meri i ting em i tru brata bilong em na kirap i go lukim abus. Meri i ting brata i kam kwik olsem wanem na askim em. Brata, nan tasol yu go long bus na yu kilim ol abus olsem wanem? Bilong wanem yu kam bek hariap tumas long haus.

Tewel man i tokim meri olsem, mi laik sutim planti abus tasol wanpela samting igo insait long ai bilong mi na mi kam. Susa yu kam na lukim wanem samting i stap insait long ai bilong mi. Yu kisim aut na mi go painim moa abus.

Man, yangpela meri ya i ting em i tok tru. Na meri ya i go klostu tru long tewel man na lukluk long ai bilong em na tewel man ya i givim kis long em. Tupela kis i go pinis nau meri ya i kra i na tokim tewel man olsem, mi susa tru bilong yu na bilong wanem yu mekim dispela kain pasin long mi. Na tewel man ya i brukim het bilong en i go daun long graun na i no mekim wanpela tok. Bi-hain em i kirap na tokim meri olsem, em i namba wantaim bilong mi long painim abus na mi mekim olsem. Ating ol samting no gut long bus i paulim mi na mi kam mekim pasin no gut long yu. Tasol nau yu tok olsem na mi sem olsem na mi go long bus long painim abus.

Meri ya i no ting lolsem dispela i tewel man, em i ting brata bilong em i mekim na em i kra i stap.

Taim tewel i go pinis, tru brata bilong meri ya karim planti abus i kam na kirapim em tasol em i no kirap, em i luk kros. Em i tokim brata bilong em olsem, husat i laikim abus bilong yu na yu, singaut planti i stap, yu yet kaikai mi no laik.

Man brata bilong meri i wari tru tasol em i no save tewel man i kam na mekim pasin nogut long em. Em nau kirap na kilim pik

bilong em long amamasim susa bilong em tasol i no nap long wanem tewel i mekim ausa pinis. Tarangu brata bilong em askim em long kam kaikai tasol em i strong moa yet na tok olsem, yu yet kaikai gutpela pik bilong yu husat i laikim gutpela pik bilong yu.

Brata bilong em i belhat na askim susa olsem mi mekim wanem pasin no gut na yu mekim olsem long mi. Orait yu no laik lukim mi, nau tasol mi lusim yu. Em tok olsem na kisim hap lek i go na sanap klostu long wanpela gutpela ples na gris bilong pik i go daun long graun na kamap wanpela raunwara.

Man, susa i kam ausait ya no gat, bikipela raunwara i raunim brata bilong em pinis. Meri i singaut na tok, yu kam na mitupela marit tasol em i go daun pinis.


Meri ya i laik go holim no gat, tait bilong wara i tromoi kam ausait gen long arere long raunwara. Na bihain em i tra i na i go insait long raunwara hia nogat wara i tromoi long hap diwai na em i dai pinis. Nau tewel i mekim na tupela susa na brata i indai long wanpela taim tasol.

*Benjamin Yapson Wewak*

**TOKSAVE:**  
WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres:  
*Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG o email edres: [editorial@wantok.com.pg](mailto:editorial@wantok.com.pg) Telepon namba: 3252500.*  
Tenkyu

Em nau! Ol pikinini i ken painim rot i go long ples wantaim Wantok kru...

# Sudoku



3	6			9	4			
		2	8			4		3
1			3				9	8
		1				8	5	
			5	4	9			
	4	5				3		
4	5				3			2
2		3			7	9		
			4	8			3	5


		7	9	4				
5		2					4	7
		4			5			9
	5		7			1	9	
	7		6		9		3	
	4	1			2		6	
4			5			8		
8	6					9		3
				6	3	4		

Ansa bilong Sudoku # 95 na # 96 neks isu


4	2	9	6	5	1	7	8	3
7	5	3	8	2	4	1	9	6
1	6	8	9	3	7	4	5	2
9	1	6	3	7	2	8	4	5
5	3	2	4	1	8	9	6	7
8	7	4	5	6	9	2	3	1
3	9	1	2	8	6	5	7	4
6	8	7	1	4	5	3	2	9
2	4	5	7	9	3	6	1	8

7	8	4	1	5	3	9	6	2
6	1	3	7	2	9	8	4	5
2	9	5	8	6	4	7	1	3
5	2	8	3	4	6	1	9	7
4	7	6	2	9	1	3	5	8
1	3	9	5	8	7	4	2	6
9	5	2	4	7	8	6	3	1
8	6	1	9	3	5	2	7	4
3	4	7	6	1	2	5	8	9

Ansa bilong las wik Sudoku # 93 na # 94



EM ORAIT




EM NOGUT

Ol wod lista hia:

- ABRUSIM
- BANIS
- DIDIMAN
- EKSOSPAIP
- FIKSIM
- GADEN
- HAIWARA
- HAMA
- INSAIT
- JEMENI
- KAGOBOI
- LAINIM
- LETABOKIS
- MAMA
- MANGALIM
- MARASIN
- NAISPELA
- ORAITIM
- PAIRITRUM
- PASIM
- RANIM
- RAUNWARA
- SAMPELA
- TAKIM
- TANTANIM

L A L U E I A I R E P W E H M T K A R W  
 C G N A K V B M O J R N A I S P E L A S  
 S R E L F C Y E F D J B T T O T K I I I  
 E R O B R A J D W E S I C A M I S K N T  
 C Y W Y J E M E N I A K A G O B O I A S  
 F A A N M R E A Y R M W K E P B S J T N  
 F Z J Q Y I I M O R P I I L A N P G G T  
 A D S S W M Q S H N E K S T I S A G A A  
 T K S N D A T J E A L K E S R T I E R N  
 H I T U O M P L M S A L P H I M P A A T  
 N E U Z T A A I G C E L A A T A W C C A  
 E I F V P O M R O T E A S I R N O E H N  
 H N M I G I S G A D E N I W U G D X T I  
 A O S J K A B R U S I M M A M A R R T M  
 Q A L A N S K O M R I A R R A L E A I W  
 S G T E S D I D I M A N Z A E I E N C R  
 N P D G R W C M D D A L F J N M I I A I  
 M T E G D E S A B A N I S Z O A E M T R  
 N F F S M E T R A O I S N L L I A I G P  
 E N I A B E I O H T F D R S D H F G Y O

Ansa bilong Wod Pilai isu 2118





# Mi gat wari na mi laikim helpim

## Mi wari long bebi bilong mi i no laikim mi

### Dia Laipain

MI WANPELA yangpela singel mama i gat 22 krismas. Boipren bilong mi na papa bilong liklik pikinini mangki i wok na stap long wanpela maining taun long narapela provins.

Mi save wok na stap ausait long taun taim liklik bebi bilong mi, husat i gat 7-pela mun nau, em mama-papa bilong mi i lukautim i stap long taun. Bebi bilong mi i dring susu botol i stap bikos em i lusim susu taim em i bin gat 4-pela mun.

Wari mi gat long en em, i luk olsem bebi bilong mi i no wari long mi nau. Long sampela wiken, mama bilong mi i save kisim bebi i kam stap wantaim mi, tasol long taim bilong go bek, em no bisi long mi. Tasol mi laikim em stret bikos em i namba wan pikinini bilong mi.

Narapela wari em, boipren husat i papa bilong bebi i no tingim mi, o raitim pas o ringim mi taim mitupela i stap longwe long wanpela narapela. Mi save wari stret taim mi tingim dispela na liklik bebi bilong mi. Long las tupela mun nau, mi no wok long kaikai o slip gut.

Mi laikim helpim.  
**Worried Mother**



### Dia Pren

TENKYU long raiti i kam long Laipain.

Mipela i sori long harim kain sindaun yu stap long en, na mipela i luksave long pilings na wari yu gat long liklik bebi i stap nau wantaim papamama bilong yu na em i pas wantaim ol. Na boipren na papa husat i no kontekim yu liklik. Bikos long dispela, yu wari na yu no kaikai o stap gut. Tasol mipela i amamas olsem papamama bilong yu i wok long lukautim bebi bilong yu. Tasol mipela i tokim yu olsem em wei bilong em long husat i stap olgeta taim wantaim bebi, em bai pas long em o ol.

Dispela i no min olsem bebi bilong yu i no laikim yu, nogat. I moabeta long yu serim dispela wari yu gat wantaim papamama bilong yu. Ol bebi i liklik tumas na wanem samting ol i mekim, ol i no luksave long en inap ol i groap long kamap ol bikipela pikinini.

Mipela i sori olsem boipren na papa bilong bebi i no save kontekim

yu na yu stap nau wantaim wari. Yutupela i bin wokim sampela plen long bihain taim bilong yupela taim yutupela i save poroman? Yu rait i go tu long em? Nogut em no save tu olsem yu gat bebi long em.

Mipela i strongim yu long kontekim em na painaut long posisen bilong em long yu na bebi. Na sapos em i no givim gutpela bekim, yu ken go lukim provinzel Welfea Opis. Ol bai helpim yu. Lo i stap we papa bilong pikinini i mas helpim long sait bilong mentenens inap pikinini i gat 18 krismas. Dipatmen bai helpim yu pulumapim fom long mekim papa bilong pikinini i peim mentenens long pikinini.

Ol man i ken lusim yumi tasol God i no inap. Putim bilip bilong yu long God tude, Proverb 3:5,6. God i promisim yumi olsem em bai no inap lusim yumi- Hibrul 13:5b.

God i ken stiaim yu long mekim disisen bilong yu.

### Laipain

*Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.*

### Laipain

# Tok Pilai wantaim Kanage



## Masol man

Wanpela bun kakaruk pikinini man kirap na askim bata bilong em. Olsem wanem long ol man i save bikipela na masol man nabaut ya? Bata bilong em kirap na bekim olsem, "Ol i save dringim planti sup." Dispela pikinini ya harim na olgeta taim em i no save isi long dringim sup. Olgeta taim em save mekim olsem na wanpela taim em tok long em yet olsem, "Man ating ol sup mi wok long dringim ya i no gat gris long en olsem pik bilong Sepik." Sapos pik bilong Hailans em mi masol man nau!"

## Kanage paitim pikinini

Wanpela taim, pikinini bikhhet na papa Kanage

paitim em. Pikinini wari na kra i stap na wankain taim tu poroman bilong Kanage i kam long lukim papa Kanage. Em i lukim pikinini bilong Kanage i sindaun long veranda bilong haus na kra i stap. Em i askim, papa i stap ah? Seken taim gen em i askim, papa stap ah? Nogat bekim, pikinini bisi long kra i stap. Namba tri taim gen em askim pikinini, papa bilong yu Kanage i stap ah? Pikinini kra i wantaim na singaut long papa, Papa! Papa Kanage bekim na tok, wanem ya pikinini yu tok. Papa, man bilong yu kam long lukim yu oh. Pikinini tokim papa Kanage, Kanage belhat nogut tru kam long paitim pikinini tasol no gat, em i lukim poroman gen na em pilim sem.

### Ol skwat!

Salim ol gutpela Kanage tok pilai i kam long: Kanage Tok Pilai P.O. Box 1982, Boroko, NCD Port Moresby. Email: jwilson@wantok.com.pg

# Ol raun nabaut poto

**BATON KAMAP LONG SIMBU:** Oil Search Rilei Baton i kamap long ples Ombondo long Simbu Provins na pikinini meri wantaim tupela wanlain bilong em, Willie Kupo na Gickmai Kundun i holim Baton i stap. *Poto: MadNESS Photography*



**RAN I GO LONG AS BILONG MAUNTEN WILHELM:** Ol rana i kisim Baton long Kundawa i go long as bilong Maunten Wilhelm long statim wokabaut i go antap long bikipela maunten long PNG. *Poto: MadNESS Photography*



**KAMAP ANTAP PINIS:** Sif gaid, Bonny Shadrach, i holim Baton antap long Maunten Wilhelm long Simbu Provns. *Poto: MadNESS Photography*

# Jack's bilong PNG i bringim gutpela klos bilong Fiji

CPL Group, stua lain bilong PNG stret, i bin opim nupela namba wan stua bilong salim ol klos bilong Fiji wantaim PNG disain long en long las wik Fraide.

Dispela i makim wanpela step moa bilong CPL Grup i mekim kampani i go bikpela moa. Planti taim ol Papua Niugini kastoma i save laikim gutpela strongpela klos i gat stail tasol em i save dia tumas ol.

Jack's long PNG em i hap kampani bilong Jack's bilong Fiji tasol ol i kamap long PNG aninit long nem bilong CPL. Dispela stua nau i stap long Waigani Sentral long Nesenel Kepital Distrik, klostu tasol long nupela Stop n Sop na Paradais Haus piksa na Hadwea Haus.

Dispela stua i kam wantaim stail na ol prais em inap long ol Papua Niugini lain i ken baim em i ol miks klos.

Dispela nupela ritel bisnis i stap olsem join vensa wantaim Jack's bilong Fiji, na em bai strongim ol kastoma bilong Waigani Sentral wantaim ol narapela bisnis han bilong CPL olsem Stop N Shop, Haus Depot na Paradais Sinema.

Insait long nupela Jack's bilong PNG stua, i gat hap bilong ol pikinini stret, hap bilong ol bikpela meri, ol yangpela meri na yangpela man, na hap bilong baim ol klos bilong wok. Em i gat tu ol samting bilong bilasim bodi olsem gris, wel, sanda bilong Fiji

stret ol i kolim "Reniu" em i Pure Fiji Prodak ol i wokim long nupela kokonas gris stret bilong Fiji. I gat ol ai glas, han paus, sutkes, hat, na ol slipa.

Planti ol klos bilong ol em ol i wokim long fektori bilong ol yet long Fiji na em i koten tasol. Long taim ol i bin opim tripela wik i go pinis, stua i lukim ol planti kastoma i kam baim ol samting. Mak olsem K300 em ol kastoma i wok long baim samting long stua.

Dispela em i namba wan taim Jack's bilong Fiji i kisim bisnis bilong ol i go ausait long Fiji. Na long PNG ol i gat tingting long go ausait long Pot Mosbi liklik taim bihain.

Nau Jack's i kisim pinis 42 wokman meri bilong PNG stret na bai ol i kisim sampela moa yet.

CPL i lusim samting olsem K4-5 milien long kirapim dispela hap bilong bisnis.

"Mipela i gat strongpela tingting olsem Jack's i redi long kamap bikpela hariap long Papua Niugini. Dispela bilong wanem mipela i gat bikpela laik long mekim ol pipel bilong PNG i amamas long werim ol naispela klos na bilas bilong Fiji we ol i no inap tro-moi bikpela mani long baim." Avinesh Prasad, Jeneral Menesa bilong Fainens na Edministresen bilong Jack's bilong Fiji i tok.

Jack's bilong PNG i karim ol bikpela nem bilong ol klos na ol narapela samting olsem Rip Curl bilong Australia na planti moa.



Grup poto bilong ol supevaisa na menesa bilong Jack's of PNG wantaim Prue Go, Pablik Rilesens Menesa bilong CPL. Poto: Frieda Sila Kana

## Air Niugini Madang wokman meri soim naispela welkam long baton

OL WOKMAN meri bilong Air Niugini long Madang ples balus i soim naispela welkam long Oil Search Pasifik Gems baton long taim em i bin kamap long Madang.

Ol dispela Air Niugini wokman meri bilong Madang em on i no lain nating, ol i gat namba na bikpela luksave insait long PNG.

Ol dispela lain i bin i winim awot olsem ol lain i save mekim dispela wok hariap na balus i no save stap

long taim long graun taim em i kamap long Madang.

Ol dispela wok lain em menesmen bilong Air Niugini i givim ol awot bilong 2014 long gutpela wok ol i save wokim.

Long las tupela wik i go pinis taim Oil Search Pasifik Gems baton i go kamap long Madang bihain long raun bilong en long Is Sepik, ol wok lain bilong Air Niugini long Madang ples-balus i holim baton na raunim balus bilong Air Niugini na bihain sanap na

kisim poto wantaim dispela baton. Bihain long dispela sotpela seremoni ol i givim baton i go long lain bilong Oil Search na ol i givim long Deputim Gavana bilong Madang, Rama Marisin.

Dispela ol stail na hatwok manmeri bilong Air Niugini long Madang ples-balus em ol lain we kampani i luksave long gutpela wok ol i save wokim na i kamapim gutpela rekot stret long yia 2014.

Ol wokman meri bilong Air Niugini long Madang i amamas wantaim Oil Search Pasifik Gems baton.

Poto: James G. Kila



## PM singaut long ol pipel kirapim bisnis

PRAIM Minista Peter i singaut long ol pipel long Papua Niugini long kirapim bisnis bikos ikonomi bilong kantri i gro na gavman i redi long sapatim pipel long statim na groim ol bisnis.

Mista O'Neill i tok ikonomi bilong kantri i gro na i gat bikpela sans i stap long ol liklik manmeri i ken wokim bisnis.

Em i mekim dispela toktok las wik long Mendi long taim bilong opim nupela hotel, Mendi Travellers Inn long Mendi Taun, Sauten Hailans. O'Neill em bilong lalibu Pangia, Sauten Hailans.

Em i tok em i amamas long lukim olsem ol bisnis long Mendi i wok long gro na kamapim planti wok na opim rot bilong moa mani bai go inait long provins long ol pipel i ken kisim sevis na amamas.

Praim Minista O'Neill i tok gavman bilong em i lukluk long sapatim bisnis long gro na

sapatim ikonomi bilong kantri. Na i putim bikpela mani long ol arapela infrastraksa olsem lo na oda long opim rot bilong bisnis. "Nau em i gutpela taim bilong wokim bisnis. Ol bisnisman na meri long kantri i wok long gro. Long mekim bisnis em i no isi samting tasol yu ken mekim, gavman i redi long helpim yu."

Em i tok no olgeta manmeri bai go skul long yunivesiti na painim wok, tasol dua i op long ol pipel i ken kirapim bisnis na no gat man bai stopim ol.

Mista O'Neill i tok gutpela menesmen na disaplin em bikpela samting long statim liklik bisnis na groim go bikpela.

Mista O'Neill i tokim ol pipel long Sauten Hailans olsem, nau em i taim bilong ol pipel bilong Sauten Hailans i mas senis. Em i tok planti bisnis i mas kamap long Mendi na larim ol turis na ol pipel long arapela provins i kam raun, slip long ol hotel na ges haus long provins.

# MORE DIRECT FLIGHTS MORE CONNECTIONS TO AUSTRALIA



**BRISBANE**

**13** times weekly from POM\*



**CAIRNS**

**11** times weekly from POM\*\*



**SYDNEY**

**2** times weekly from POM

**Air Niugini**  
www.airniugini.com.pg  
EXCLUSIVE CARRIER FOR THE 2015 PACIFIC GAMES



\* POMBNE twice daily except for Sat.  
\*\* POMCNS twice daily except for Tue/Wed/Sat.  
CNSPOM twice daily except for Wed/Thu/Sun.

For more schedule information, go to www.airniugini.com.pg

# PNG Ports bai yusim K200 long stretim ol sip bris

PNG Ports Corporation Limited (PNG-PCL) i tok tripela bilong 15-pela bris long kantri tasol i mekim mani.

Tasol kampani bai go het na stretim olgeta sipbris long kantri long givim gutpela sevis long ol pipel na bisnis long mani mak bilong K200 milien.

Sif Eksektiv Opisa (CEO) bilong PNG Ports, Stanley Alphonse i tok Pot Mosbi,

Lae na Kimbe bris tasol i mekim mani na ol arapela i no mekim, tasol kampani i save givim sevis nating aninit long komyuniti sevis obligesen.

Mista Alphonse i tok PNG Ports i yusim K400 milien long las 3-pela yia long ol wok developmen long ol bris raun long kantri.

Em i tok kampani i yusim K45 milien long developim Alotau bris na dispela i helpim Alotau bris long kisim 11 stori krus laina na ol arapela krus sip na i promotim namba bilong turis long Milen Be Provins.

CEO Alphonse i tok narapela K45 milien em kampani i yusim long stretim bris long Wewak long bihainim ol diman bilong ikonmik ektiviti i kamap long Oil Pam industri long Wes Nu Briten Provins.

K10 milien kampani i investim long stretim Oro Bay bris na toktok i kamap yet wantaim is Sepik provinsal gav-

man long stretim wewak bris na wankain bai kamap long ol arapela bris long kantri.

Mista Alphonse i tok kamapani bai kirapim tripela bikpela projek long Pot Mosbi, Aitape na Rabaul bris.

Em i tok gavman i tok orait long K100 milien long wokim gutpela bris long Wes Sepik provins.

Dispela mani i go long Aitape distrik. PNGPCL em i menesa bilong dispela projek.

Mista Alphonse i tok olsem planti bilong ol sip bris long kan tri i no mekim mani na i no gat diman tasol kampani i mekim invesmen long givim sevis long ol komyuniti.

Em i tok ol invesmen kamapni i mekim em i gutpela long ol turis na sevis bilong lokol pipel.

Rabaul bris bai ol i muvim go long narapela lokesen bikos kamapni i yusim bikpela mani long rausim ol pipia bilong volkena o maunten paialong bris na long rot.

Em i tok wok redi bilong muvim Pot Mosbi sip bris i go long Motukea, a-sait long Mosbi siti i go orait.

Mista Alphonse i mekim dispela ol toktok long las wik taim bot i makim em long kisim bek wok bilong CEO bilong PNG Ports long namba tut aim bihain long 3-pela tem bilong em i pinis.

# Juffa salensim ol pipel long senis

Stanley Nondol i raitim

**GAVANA bilong Oro, Garry Juffa i salensim ol pipel long Oro long no ken westim taim na ol i mas senisim ol yet long helpim Oro na PNG long senis.**

Gavana Juffa i tok, long lukim ol bikpela milien kina developmen, em i no isi.

Tasol em bai kisim sampela taim long ol lida na gavman long kisim ol sevis i go long ol pipel.

Em i tok ol pipel i mas senisim ol pasin bilong ol yet na no ken westim taim bilong ol.

Mista Juffa i tok yumi wanwan i mas senis insait long yumi yet na redi long wok bung wantaim gavman na ol developmen patna long developim ples, na i no long stap nating na singut long gavman

long kisim sevis i go long haus dua insait long liklik taim.

Em i tok gavman i lukautim mani bilong pipel tasol em i mas bihainim gut lo bilong yusim mani long givim sevis na i no long givim mani nating long wan wan mani olsem poket mani.

Gavana Juffa i givim dispela toktok long Popondetta taun las wik taim ol opisa bilong gavman bilong Australia na Papua Niugini i go lukluk raun long ol wok bilong 4-pela nupela bris long Oro Provins.

Ol delegesen i bin go lukim wok na selebret wantaim ol pipel bilong Oro em; Gavana bilong Oro, Garry Juffa, Seketeri bilong Woks David Vere, Seketeri bilong Trensport Roy Mumu na Hai Komisina bilong Australia Debo-

rah Stokes i go kamap long Oro long lukim ol wok bilong 4-pela bris, na brukim graun seremoni long makim wok kamap.

Ol 4-pela bris em Australia na PNG gavman i putim K139.4 milien long wokim nupela bris bihain long Saiklon Guba i bagarapim ples long 2007.

Em i kisim 7-pela yia olgeta long ol pipel i kisim gutnius long las wik taim PNG na Australia gavman i tokaut olsem gavman bilong em i putim mani long wokim nupela bris long joinim ol pipel i go long ol besik sevis bilong gavman na bisnis.

Ol 4-pela bris em Eroro, Giura Kamusi na Ambogo. Kamusi em bai wanpela longpela dabol len bris long kantri wantaim longpela bilong en bai stap long 285 mita.



Ol ples long Oro i amamas long helpim bilong Australia gavman na i givim gif, (tapa klos) long Hai Komisina bilong Australia, Deborah Stokes.

# BSP invest long HR

...Tripela bai kisim trening long Philippines

BIKPELA komesel benk long kantri, Benk Saut Pasifik (BSP) bai salim tripela wokman i go kisim trening long Lidasip Developmen long Benk bilong Philippines Ailan (BPI) long tripela mun.

Alex Rogea, Nuni Kulu na Rebecca Senge em ol namba tri lain bilong go ovasis aninit long BSP Lidasip Developmen Progrem (LDP) taim em stat long 2013.

Bikpela tingting bilong dispela LDP program em long givim moa strong long ol wokman meri long mekim ol senia na eksekutiv lidasip wok long neks 3-5 yia.

BSP i putim moa mani long trenim ol lidasip developmen progrem olsem BPI Sekonmen Progrem lon g ol jenerel menesmen, ol sinia menesa na nupela Lidasip Developmen Program wantaim Melbourne Bisnis Skul na Eksekutiv MBA progrem bilong ol Sinai lida.

Sif Eksektiv Opisa (CEO) bilong BSP, Robin Fleming i tok BSP nau i lukluk long stretim ol sel na sevis na long mekim dispela i karim kaikai. Na BSP i gat bikpela wok long mekim bikpela invesmen long humen risos we i bikpela aset.

As tingting bilong dispela em long developim ol neks jeneresen bilong ol

lida long menesim benk.

BSP i lukim olsem ol wokman i ma si gat ol skil, na motivesen long mekim ol wok bilong ol salens bilong benk.

Bisnis i gro na planti bikpela enis i wok long kamap long wol na benking industri wantaim ol bikpela salens. Olsem na ol wokman meri bilong BSP i mas save long wanem samting i kamap long intanesenel maket long ol i ken opim tingting na apim save long mekim wok aninit long ol dispela salens na senis bilong industri.

Nuni Kulu em i eria menesa bilong Sauten rijon.

Em bilip olsem i gat bikpela hap bilong gro long ol rurel eria i stap yet. Na dispela ol trening bilong em bai helpim em long karim benking sevis i go long ol pipel long rurel eria.

ALEX Rogea, Hetman bilong HR streteji na Senis i tok em gat dispela trening em bai kisim i ken helpim em long bikpela rot long kam bek na givim bek long sevis bilong benk na kantri.

Rebecca Senge, sinia menesa, Operesen Risk i tok em i amamas long kisim trening long wanpela bikpela benk bin stap long pela taim. "Lukim ol mekim wanem long hap i ken helpim wok bilong em long hia," Mis Senge i tok.



(L-R) Rebecca Senge, Alex Rogea na Nuni Kulu.

# Puma bai givim K3m fiul long YWAM medikel sip

Stanley Nondol i raitim

BIKPELA fiul saplaia long kantri, Puma Energy i sainim agrimen wantaim Yut wantaim Misin (YWAM ) long Puma bai givim fri fiul saplai long mak bilong K3milien insait long 2-pela yia.

Menesing Dairekta bilong YWAM, Ken Mulligan, Petron bilong YWAM , Sir Rabbie Namaliu na PNG Jenerel Menesa bilong Puma Enegy, Hulala Tokome i sainim MoU aste long Pot Mosbi sip bris.

Mista Tokome i tok Puma Enegy i amamas long wok bilong YWAM long helpim ol sik-

man meri long ol nambis ples long PNG, na i amamas long givim fri fiul, oil na ol arapela samting long sapotim wok bilong YWAM.

YWAM i baim nupela 5- stori sip long K6.5 milien long Australia long Oktoba las yia na dispela sip i kamap long kantri long dispela wik Mande.

Dispela sip i ken karim 1000 manmeri long wan wan taim i karamapiml kru na woklain bilong YWAM.

Dispela sip bai givim medikel sevis long Milen Be, Oro, Sentral, Galp, Westen na Morobe provins.

Ol medikel sevis YWAM i save

givim long ol remot o rurel ples long 6-pela provins em praimerihelt ke, optometri, dentistri na givim trening long ol volantia long ol komyuniti long kisim save long helt ke.

Mista Mulligan i tok YWAM i save ran isi long ol nambis long daunim kos bilong fiul. Taim sip go long wanpela provins i save stap long hap olsem 2 o 3 pela wik na bihain save go long narapela provins.

Em i tok helpim bilong Puma Enegy em bai helpim YWAM long mekim moa wok long ol rurel nambis ples na givim helt sevis long planti pipel long PNG.



Menesing Dairekta bilong YWAM , Ken Mulligan i sekan wantaim Jenerel Menesa bilong Puma, Ken Hulala Tokom na Sir Rabbie i lukluk i stap.

# Planti liklik bot long PNG solwara no gat sefti



Seila boi bilong Wali kantri, Timothy Liwa soim wei bilong werim laip jaket.

Poto: James G. Kila

James G. Kila i raitim

**PLANTI** liklik moto bot o dingi i save karim ol pasindia na katim solwara long Madang provins na ol arapela provins long PNG i no save bihainim ol sefti lo na tu i no save karim sefti ikwipmen long sevim ol pipel taim birua i bungim ol.

Ol papa bilong ol moto bot i save tingting tumas long kisim mani na i no save tingim laip bilong ol pasindia.

Timothy Liwai, husat em ekspirians kru bilong *mv Carrie*, wok-bot bilong Ramu NiCo (MCC) i mekim dispela toktok bikos planti taim wok-bot bilong kampani i save helpim ol lokal bot bilong Raikos i bungim hevi.

Long Mande mv *Carrie* aninit long Kepten Isaac Dau i bin sevim tupela lokal bot bilong Raikos we i trip long solwara taim bensin i pinis.

Mista Liwai, i tok maski olsem Nesenel Maritaim Sefti Atoriti (NMSA) i givim toktok long sait long sefti long ol papa bilong ol liklik bot olsem ol bot bilong ol i mas gat sefti ikwipmen, planti ol i no save harim na bihainim lo bilong sefti long solwara.

Madang i gat planti banana bot tru we i save ran namel long Madang na Raikos, Madang na Karkar na Manam

# Tingim prais na groim moa kakao - Gaiyu

James G. Kila i raitim

OL RUREL fama long PNG husat i gat bikpela graun i stap nau i mas stat planim moa kakao bikos prais bilong kakao bai go antap.

Siaman bilong Basamuk Kakao Koporetiv Sosaiti, Tony Gaiyu i givim dispela salens long ol rurel kakao famas.

Gaiyu i mekim dispela toktok bihainim maus Sif Eksekutiv PNGCCIL, Dokta Eremas Tade, husat i bin tokaut olsem prais bilong kakao long kantri bai go antap

Dokta Tade i bin tokaut dispela long lonsing seremoni long Basamuk we CCIL putim kamaut 10,000 kakao sidling neseri bilong ol kakao we sik nogut ol i kolim Kakao Pod Bora (CPB) i no inap long bagarapim ol. Dispela wok-bung i kamap aninit long pablik-praivet patnasip (PPP) wok namel long Ramui NiCo na PNGCCIL.

Basamuk em wanpela long namba wan eria insait long PNG long kisim ol kakao sidlings we CPB i no inap long

ailan tasol i no gat gutpela sefti stap antap long ol.

Narapela komyuniti lida bilong Karkar ailan long Madang, Jonathan Simingi tok olsem NMSA i mas wokim moa aweanes long redio na niuspepa long tok save moa long ol papa bilong ol liklik bot long sait bilong sefti samt-ing antap long bot. Em bai sevim planti manmeri long PNG.

Simingi tok olsem sefti samt-ing olsem rop, flota, moa jum o bensin, oil, laip saket na samt-ing bilong givim sain long ol arapela bot long kisim helpim i mas stap oltaim antap long ol bot.

“Ol skipa na kru save yusim tasol mobail fon long ringim ol pren o arapela bot long helpim taim bagarapi bungim ol,” Simingi tok.

Em i tok NMSA bai putim ol bikpela sain bot long ol pablik ples we ol manmeri i save kisim ol moto bot long soim sefti bilong ol bot taim ol i ran long solwara.

“Em tru olsem planti taim manmeri save sakim tok na wokim samt-ing long laik bilong ol yet, tasol ol papa bilong ol moto bot i mas yusim tingting bilong ol na redim ol sefti ikwipmen oltaim antap long bot bilong ol,” Simingi tok.

bagarapim ol, na ol dispela kakao sidling em bai helpim stret ol kakao famas long Raikos distrik.

Long dispela taim tu i lukim Ramu NiCo wantaim PNGCCIL na ol lenona asosesin bilong Ramu Projek i bin sainim wanpela memorandum ov agri-men (MOA) long wok bung wantaim insait long dispela PPP wok long strongim kakao prodaksen..

Dokta Tade i tok askim o dimand bilong kakao i wok long go antap long 3 % mak long olgeta yia, na dispela bai mekim saplai i pundain long 2010. Olsem na sapos ol famas i planim kakao tude, ol bai gat sans long kisim gutpela mani taim prais bilong kakao i go antap long 2020.

Dokta Tade i tok fleiva o swit bilong PNG kakao em namba wan tru insait long wol, na moa long 90% lain blong baim kakao i save laikim olsem na dimand o askim bilong kakao bilong PNG bai antap stret na dispela bai lukim prais bilong kakao tu i go antap long dispela taim long 2020.

# Gavman bai skruim strong sevis long Pomio Distrik

Michael Novingu i raitim

GAVMAN bai go het long givim sevis i go long manmeri bilong Pomio distrik na bai ol i kirapim gutpela sindaun bilong ol.

Praim Minista Peter O'Neill i mekim dispela toktok long Sinivit Lokol Level Gavman long Warangoi taim em i lonsim kempen bilong Pipels Nesenel Kongres Pati kendidet, Francis Waina las wik Fraide.

Mista O'Neill i tok sapos Mista Waina i winim Pomio bai lleksen, gavman bilong em bai helpim em long kisim sevis i go long ol manmeri bilong Pomio distrik.

Em i tok Pomio distrik i gat mani mak olsem K25milien i stap long karimaut wok developmen long kirapim gutpela sindaun bilong ol.

Em i tok gavman bilong em i givim planti mani long helpim ol

Polis, CIS na Ami long lukautim wok bilong lo na oda long kantri.

Mista O'Neill i tok Edukesen na helt em tupela bikpela samt-ing long laip bilong ol manmeri.

Em i tok gavman bilong em bai gohet yet givim fri edukesen na helt sevis long ol manmeri bilong dispela kantri.

Mista O'Neill i tok long 2016, gavman bilong em bai givim K200m long helpim ol sumatin i go skul long ol bikpela skul olsem ol yunivesiti, tisa kolis na ol arapela bikpla skul long dispela kantri.

Em i tok dispela mani ol sumatin bai dinau na peim skul bilong ol.

Em i tok Is Nu Briten provins i go pas long wok bilong lukautim turis na wok didiman long planim kakao, na i save kamap gut.

Em i tok gavman bilong em bai givim moa mani long surukim

wok bilong kamapim gut Tokua ples balus long kisim moa turis i kam long ENB na kantri wantaim.

Long wankain taim, Gavana bilong Is Nu Briten, Erema Baining junia, i tok 38 krismas i go pinis na kantri i no lukim divelopmen i kam long provins.

Em i tok tude taim O'Neill Dion gavman i stap, yumi lukim planti senis i wok long kamap long Is Nu Briten provins.

Em i tok ol dispela sevis bai helpim sindaun bilong ol manmeri long ol hauslain bilong ol.

To Baining i tok 8-pela kilomita rot we ol wok i stap nau long en li stap long Palmamal na kamap long Kokopo.

Em i tok sapos Francis Waina i winim Pomio Bai lleksen, ol bai wokbung wantaim long developim Pomio Distrik na Is Nu Briten Provins.

# Ol Pasifik ailan gavman i mas sapotim fiseris na egrikalsa

OL Pasifik pipel i save yusim fisheri na egrikalsa long lukautim laip bilong ol . Helen Hakena em dairekta bilong Leitana Nehan Developmen ejensi long Bogenvil i tok ol gavman bilong Pasifik rijon i mas traime na helpim, na strongim ol wok bilong ol sivil sosaiti grup long wanem, ol i save sanap makim tru ol pipel bilong ples.

Askim bilong Misis Hakena i bihainim miting bilong Stetus ov Wimen em i bin stap long en long

Yunaited Nesens Jenerel Asembli long New York long mun i go pinis.

Em i tok tu olsem ol ailan kantri long Pasifik i gat ol kain kain wari i no wankain olsem ol narapela kantri, na ol i mas toktok strong long Yunaited Nesens long ol dispela wari bilong ol.

Sampela long ol dispela wari i em klaimet senis, humen raits, na wok bilong lukautim ol pis long ol solwara blong yumi.

# 10-pela provinsel senta i sain ap long Pasifik Gems selebresen program

TENPELA provins long kantri i wokim komitmen long kamapim ol ples we ol pipel bilong ol i ken lukim ol laip program long 2015 Pasifik Gems.

Ol i kolim program long “Community Celebration Site” program.

Aninit long dispela program, ol provinsel gavman bai sanapim ol ples we ol pipel na ol visita bai gat sans long lukim ol brotkas

bilong ol Gems, ol ats na kalserelektiviti long ol provins yet.

Ol 10-pela provins bai ranim ol program em Sentral, Galp, Manus, Oro, Is Sepik, Wes Sepik, Atonomas Bogenvil Rijon, Westen Hailans, Isten Hailans na Westen Provins.

Westen Provins bai gat tupela laip selebresen ples.

Ok Tedi Maining em i platinum sponsa bilong 2015 Pasifik

Gems na em bai bildim dispela ples long soim laip selebresen long ol Gem long Tabubil Taun.

“Ol dispela “site” o ples bai konektim olgeta pipel long dispela kantri wantaim Gems long Mosbi na pipel long ol provns i ken serim amamas long win na lus wantaim, na ol klaserel ektiviti tu,” CEO bilong Gems Ogenaising Komiti, Peter Stewart, i tok.

Hetmasta na ol sumatin bilong Kwiloknai Praimewri skul long Westen Provins i welkamim Oil Search Pasifik Gems rilei baton taim tim i raun i go long skul bilong ol. Poto: MadNESS Photography



# Strongim plening bilong Gems

**TAIM de bilong Saut Pasifik Gems pilai i wok long kamap klostu long mak olsem tupela mun tasol, ol lain i wok long ol ki fansen eria i bisi nau long sait bilong plening na kodinesen.**

Olsem na nau, ol i wok long holim ol bung olgeta wik long PNG Institut bilong Pablik Edministresen kempus long Waigani (PNGIPA) long lukim olsem ol Gem bai ran gut.

Olgeta veniu o ples we pilai bai kamap long en i gat ol tim bilong wan wan long ol pinis we i gat long en ol ki fansen eria olsem medikel, katering, klining, sekyuriti, trenspot, spot kompetisen na ol pres operesen memba.

Eksekutiv Menesa, Operesen bilong Gems Ogenaising Komiti

(GOC), Clint Flood i tok ol veniu tim miting i makim bikpela samting long plening bilong Gems.

Em i tok long muv i go long veniu plening i larim ol ki fansen eria long muv long baset na polisi i go long rot ol bai yusim ol spes ol i gat na rot we ol sevis bai ran long en long ol veniu tim.

Moa long 200 pipel i stap long ol dispela miting na namba bai go antap taim moal volantia tim lida i go insait long ol tim.

Long Jun 1 taim ol i givim ol veniu i go long han bilong GOC, ol bai holim ol miting long ol veniu yet.

Mista Flood i tok ol kontrakta i wok hat stret long ol veniu na inapim taim bilong pinisim ol wok long Jun 1.

# Salens long ol volantia tim lida bilong Gems

**SALENS i go long ol Gems volantia lida long save gut long ol woklain bilong ol long helpim, kosim, givim stia na go pas gut long ol na ol i ken mekim gut wok.**

Sif Eksekutiv Opisa (CEO) bilong Gems Ogenaising Komiti (GOC), Peter Steward, i bin wokim dispela salens insait long bung long PNG Institut bilong Pablik Edministresen long las wik Sarere.

2015 Pasifik Gems bai gat 137 volantia tim lida husat bai kamap olsem ki pipel long wok wantaim Gems Volantia Wokfos na ol Ogenaising Komiti woklain long taim bilong Gems.

Ol dispela tim lida bai mekim bikpela wok long go pas long ol volantia grup na kodinetim ol wok bilong ol volantia i ran gut.

Mista Steward i bin tok, "Long

Gems i kamap gut, em i stap long han bilong yupela, na mi gat bikpela bilip olsem bai yumi kamapim gutpela na bes pilai insait long kantri na rijon."

Ol eria we ol tim lida bai wok long en em long taim bilong Gems em, operesen bilong Gems Viles, trenspot, akreditesen o sekim gut ol man i go insait long ol veniu, spekteta sevis, VIP na protokol, veniu operesen, teknoloji, midia operesen, ol seremon, brotkas, lojistik na ol trensleta (Frans).

Bisnis Menesa bilong GOC, Luke Ambu i tok "mipela i gat bilip long ol tim lida bikos ol i gat save na ekspiens long menesim, glasim na skelim, toktok namel long wampela narapela long helpim long kamapim gut ol Gem."

Ol tim lida bai kisim ol trening long redim ol long wok.

# GOC holim Disabiliti woksop

PASIFIK Gems bai lukim ol kain manmeri i pilai na dispela i karamapim tu sampela disebol lain we i gat sampela asua long bodi bilong ol.

Olsem na long las Sande long Mosbi, samting olsem 150 woklain bilong Games Organising Committee (GOC) i bin holim wampela disabiliti awenes trening long kisim moa save na awenes long ol bikos sampela bai stap in-

sait long ol pilai long dispela bikpela gem long mun Julai.

Sif Eksekutiv Opisa bilong GOC, Peter Steward i bin tok wantaim ol etlit, ol lain bai lukim pilai na ol kontrakta na ol woklain bilong ol disebol i stap insait, bikpela samting em i moabeta long olgeta i luksave long nid bilong ol (disebol) long operesen bilong Gems.

Disebol sempion Paralimpik

atlit na solva medol wina na Gems ambaseda,

Francis Kompaon, i bin stsap insait long dispela awenes woksop i tok yumi mas luksave na larim ol disebol lain i traim ol samting na mekim ol samting ol yet, na no ken pilim sori tumas long ol.

Darren Cunningham i wampela foma wilsia tenis pilai i bin pas long dispela woksop.

# Wokabaut bilong Oil Search Pasifik Gems Rilei baton

## ...Hailans na Westen Provins

OIL Search Pasifik Gems Rilei baton tim long dispela wik i stap long Westen Provins bihain long em i raun long ol Hailans provins long las wik.

Bikos long bikpela klaut, tim i no bin go long Kiunga, tasol helikopta i bin karim ol i go long Tabubil, em maining taun na les bilong Ok Tedi Maining Kampani (OTML) em Platinum sponsa bilong 2015 Pasifik Gems.

Rilei tim i bin wokim namba wan stop long Finalbin Praimeri skul we i stap klostu tasol long kopa na gol taun, Tabubil.

Moa long 400 sumatin i bin welkamim tim na singim nesanel entem, apim fleg na larim wan wan sumatin i holim baton na givim i go long narapela.

Lusim skul, baton i bin raun long Tabubil Taun na tim i bin wokim rilei ran na olgeta i bin amamas long stap insait long en.

Nupela Siaman bilong OTML, Sir Moi Avei, i bin kidim baton na givim i go long skul na taun komuniti.

Ol spesel ges rana bilong baton i gat long en Team Papua New Guinea boksing skwat husat i stap long Tabubil long wokim trening long OTML jimnasium inap long wik i kam.

OTML i bilip olsem dispela trening i ken strongim ol long win long Gems.

Planti pipel i bin lain long ol strit long soim sapot wantaim ol bona i gat ol toktok olsem, "Mipela i sapotim yu, yu na mipela em

PNG. Kain taim em yumi tingim ol etlit, ol hiro bai kamap, ol lejen bai kirap, em taim bilong yumi, em pilai bilong yumi na go PNG."

Rilei tim i bin go antap long Ok-sapmin na Nomad, na bihain go bek long Tabubil long raun i go lukim main.

Las wik, tim i bin raun i go long Kundiawa long Simbu provins na go antap long bikpela maunten stret long PNG, Maunten Wilhelm.

Man i bin disainim baton em Gickmai Kundun bilong Simbu Provins i bin raun wantaim tim na ol pipel long ples bilong em, Om-bondo, i bin givim bikpela welkam long tim na Gickmai.

Tim i bin lusim beis kem long bikmoning Fonde na kamap long Maunten Wilhelm we i stap 14,793 mita antap long si level o solwara, long las Fraide moning. Bihain long Simbu provins, tim i bin skruim wokabaut i go long bek long Goroka long las Sarere na long Mande, ol i bin lusim hailans na go long Westen Provins.

**ANTAP TRU:** Ol baton rana i win long kamap na sanap antap long bikpela maunten long PNG, Maunten Wilhelm long Simbu Provins.

**TABUBIL TAUN RILEI:** Baton i kamap long Tabubil na rilei tim i karim baton na ran i stap.



**MIDIA TIM:** Hia em Pres o Midia tim bilong Pasifik Gems bai mekim bikpela wok long kisim nius bilong Gems i go aut long kantri, Pasifik na wol.



**HELPIM OL VOLANTIA:** Ol GOC lain i helpim ol volantia lida.

Ol Poto: MadNESS Photography





# MV Carrie helpim tupela liklik bot bungim hevi long solwara



Ol kru bilong MV Carrie i helpim wanpela mama long liklik bot em bensin pinis long solwara bilong Astrolabe Be long Mandé.

Vais Presiden bilong Ramu NiCo, Charles Zha i toktok long lain kru bilong MV Carrie i helpim.

**WOK SIP bilong Ramu NiCo Menesmen (MCC) MV Carrie long dispela wik Mandé, Epril 20, 2015 i soim gutpela pasin tru long helpim tupela liklik lokal bot bilong Raikos taim ol dispela bot i bungim hevi long solwara long Astrolabe Be long Madang provins.**

Kepten Dau i tok em i lukim sampela lain antap long bot i tromoi waitpela laplap i go antap long soim olsem ol i nidim helpim. Dispela ol lain i trip long solwara samt-ing olsem seven (7) kilomita longwe Dellman basis long

Madang taun em Kalibobo laithaus tu i stap long en.

Em i tok taim em i lukim ol lain ya i tromoi laplap na singaut long 'helpim' wantu tasol em i tanim sip MV Carrie na go bek long helpim. Ol kru bilong MV Carrie i givim han long helpim ol lain long dispela liklik moto bot we i gat sampela mama wantaim ol pikinini tu i stap antap long en

"Taim mi lukim ol sampela lain antap long dispela liklik bot i apim waitpela laplap na tromoi han mi luksave olsem ol bungim hevi, olsem na mi tanim sip i go bek long helpim ol," Kepten Dau i tok.

Vais Presiden bilong Ramu NiCo, Charles Zha tu i bin stap antap long MV Carrie long dispela ron bilong sip long Basamuk i go long Madang.

VP Charles i amamas tru long

dispela taim long lukim gutpela wok em Kepten bilong MV Carrie, Issac Dau na Sif Enjinia em 'papu' yet Damien na ol hatwok lain na stail kru bilong sip i wokim long helpim ol lain long liklik bot ya.

Kepten Dau i tok olsem ol kru bilong MV Carrie i helpim long kisim ol meri na pikinini long tupela banana bot na na putim ol antap long sip na bihain taitim rop long ol ol banana bot ya na pulim ol i go olgeta long Madang taun.

Em i tok olsem ol lain long namba wan banana bot ol helpim ol lain long Mingming eria klostu long Gawar riva long Raikos na antap long dispela banana bot i bin gat 10-pela lain.

Em i tok namba tu banana bot em MV Carrie i bin helpim ol samt-ing olsem tupela kilomitas longwe long Madang Dellman pabis. Dis-

pela bot em nogat tru bensin na i trip nating long solwara stap taim sip bilong Ramu NiCo i helpim.

Kepten Dau i tok dispela namba tu banana bot ol i bin helpim em ol lain husat i save stap long ples Bobidik em arere tasol long Ramu NiCo Rifaineri long Basamuk

Dispela wok-sip o ferri bilong Ramu NiCo i save givim planti gutpela helpim long ol lain bilong Basamuk na Raikos eria taim ol i nidim tru helpim.

Long histori bilong taim Ramu NiCo i kisim MV Carrie i kam long Australia long wokim wok bilong kampani long bringim ol wokman meri bilong en i go kam long Basamuk, MV Carrie i bin wokim tu planti ol gutpela arapela wok helpim.

Long ol yia i go pinis MV Carrie i bin helpim sampela lain we i

bungim hevi long sait blong sik na tu mama i nidim helpim, na sip ya i karim ol long Basamuk i go long Modilon Hausik long Madang taun long kisim helpim

Wanpela bikpela helpim tru MV Carrie i bin wokim em long Oktoba 2013, taim dispela sip i brukim tutak na ron long nait i go helpim na bringim ol lain we i no bin dai bihain long Airlines PNG balus i bin paia na pundaun arere long Guabe long Raikos.

Dispela wok-sip MV Carrie i wokim planti gutpela wok long sevim ol arapela lain long Madang provins, tasol planti lain i no save tumas.

Wok em i wokim i soim olsem Ramu NiCo em redi long helpim ol lain i nidim helpim long taim bilong birua stret.



**Ramu NiCo Management (MCC) Ltd,**  
the manager of Ramu NiCo Project is proud to host the 5th  
**NATIONAL MINING EMERGENCY RESPONSE CHALLENGE**  
in Madang

Date: August 22-25, 2015  
Venue: DWU & PNG Maritime College



# Ragbi nius bilong dispela wik



## Jake Granville i skoim hat trik taim North Queensland i winim ol Warriors 28-24 long namba 250 pilai bilong Johnathan Thurston

Jake Granville i bin putim ol trai long ol Cowboys i givim Johnathan Thurston na tim bilong em 28-24 win egensim ol Warriors long namba 250 NRL gem o pilai.

I bin luk olsem North Queensland bai i lus long ol Warriors long Townsville las Sarere nait bipo

Granville i skoim namba tri trai long fainel 2 minit na ol tim bilong em i bin win.

Long bikpela hap bilong gem, ol Warriors i bin go pas wantaim 12-0, tasol klostu long pinis bilong pila, olsem 78 minit, Ol Cowboy i kisim narakain strong na Granville i putim train a ol i winim ol Warriors.



## St George Illawarra Dragons i skoim 12-10 long winim Brisbane Broncos long Kogarah

SEN George Illawarra i skruim strong na win bilong ol aninit long kosa, Paul McGregor, we i lukim ol Dragons i daunim top tim, Brisbane wantaim 12-10 skoa long Kogarah Oval.

gat ol gutpela NRL pilaia na maski ol visita i pilai strong, ol Dragon i pilai strong moa we i lukim ol i winim dispela gem.

Ol Broncos i bin gat 15-pela pilaia tasol bikos tupela pilaia bilong ol, skipa Justin Hodges na bek rowa, Alex Glenn, i bin gat bagarap na ol i no pilai.

Touted as wooden-spoon contenders after opening the season with back-to-back defeats, Tim bilong McGregor i



## Benji Marshall bilong St George Illawarra i stap long lain ap long go bek pilai wantaim ol Kiwi tripela yia bihain long laspela Tes

Bihain long wanpela yia em i pilai ragbi yunien i pinis, Benji Marshall i redi nau long putim jesi bilong ol Kiwi gen na pilai.

Ol dram i wok long pairap long tes keria bilong Marshall long Anzac Tes long Brisbane neks wik.

Manly hap, Kieran Foran i gat bagarap na olsem, kosa bilong Nu Silan, Stephen Kearney i painim wanpela pilaia long patna wantaim hap

bek, Shaun Johnson.

Na dispela pilaia em Marshall, 30, we long Fonde bai gat wanpela yia bihain long Supa Ragbi i bin lusim kontrak bilong em wantaim ol Blues.

Em i bin pilaim 2014 NRL sisen wantaim St George Illawarra na kamapim gut piksa na strong bilong ol Dragon we i lukim ol i go pas long lata bihain long 7-pela raun.

## Ol Cronulla Sharks i winim South Sydney Rabbitohs long no gut weda

Cronulla na South Sydney i bin pilai long bikpela ren na strongpela win long Shark Park na ol Cronulla i bin bagarapim sindaun bilong ol Rabbitohs wantaim 18-10 win.

Long bikpela ren na strongpela win long mak bilong 100km/h long Mande nait, ol Sharks i bin go pas 10-4 long namba wan hap, na skruim win taim Jayson Bukuya i putim sko 6-pela minit bipo long taim bilong gem i pinis.



## Daly Cherry-Evans i tok ol ripot i no tru long em bai lusim ol Gold Coast Titans



Daly Cherry-Evans i kros no gut tru long ol midia ripot na i tok ol toktok olsem em bai lusim Queensland na joinim Gold Coast long 2016 i no tru.

Ol ripot i bin kamap long las wik Fonde olsem Cherry-Evans i wok long tingting planti long lusim Manly na go bek long Queensland bipo long namba 13 NRL pilai i pinis.

## Parramatta Eels i winim Newcastle Knights 28-22 bihain long dabol sko bilong leit Nathan Peats

Parramatta i kam bek gen taim em i win 28-22 egensim Newcastle long Hunter Stadium.

Tupela leit trai bilong Nathan Peats i bin kirapim bek ol long winim ol Knights husat i wok long winim ol stat yet long 2009.



# Etletiks kamap long Lae

TOEA Wisil, Mowen Boino na Betty Buru i kamap pinis long Lae long stap insait long Nesenel Trek na Fil Etletiks Sempionsip long Sir Ignatius Kilage Stadium. Wisil, Boino na Buru i bin go stap long ovasis long trening skul na resis long sampela sempionsip.

Ol tripela bai join wantaim ol nara-pela PNG Etletiks long traim long mekim nem long stap insait long tim bilong Pasifik Gems. Ol seleta bilong ol Etletiks bai stap tu long dispela taim long makim tim bilong wok redi bilong Pasifik Gem bai kamap long Julai.

Planti bilong ol Etletiks i stap pinis na dispela em taim bilong soim tru husat bai kisim nem bilong kantri na stap resis long Pasifik gems. Presiden bilong PNG Etletiks Tony Green i tok, i

nogat taim moa long kisim ol makim ol nupela Ekliks long stap insait long tim.

Green i tok, long 12-pela mun go pinis, ol i bin holim ol liklik sempionsip, bikipela PNG Gems long Lae na Nesenel Sempionsip na makim planti ol yangpela manmeri. Na dispela wiken ol dispela lain mas soim ol yet long kisim ples insait long tim.

Ol etlit manmeri bai kam olsem long Is Nu Briten, Nu Ailan, Wes Nu Briten, Simbu, Enga, Goroka, NCD Is Sepik, Morobe na Popondetta

Green i tok, ol bai i no inap long askim olgeta provins long kam bihain long PNG Gems i kamap long Lae na planti provins I tromoi planti mani long lukaut ol taim stap long dispela bikipela spot resis.

# Digicel Kap kamap gut

BIKPELA Ragbi lig long PNG Digicel Kap i stat pinis long wiken i go pinis. Na ol dispela provins i bin lukautim pilai i bin amamas long lukim dispela semi profesinel ragbi i kik ov wantaim stail.

Nupela tim Wagii Tumbi i bilong lukautim pilai bilong ol wantaim Lions long Minj, dispela gem i bin kamap gut tru Lions i daunim Tumbi.

Rabaul Gurias i bin seksek liklik taim ol pukpuk bilong Gulf Isapea i ron antap long graun bilong ol long Kalabon. Dispela pilai bilong tupela tim i pulim planti sapota long go lukim pilai bilong tupela. Gurias i bin kamapim gutpela pilai long winim gem 22-18.

Enga Mioks i daunim sempion Wigmen long Wabag taim ol lain bilong Hela i kisim Haiwe go daun long pilai wantaim ol. Mioks i kamapim gutpela pilai long ai bilong ol sapota bilong ol long kisim 2poin long lata.

Lae Tigers i stap long gutpela fom long pilai taim ol daun Goroka Lahanis long Goroka. Lahanis em wanpela tim we em save kam bek long bihain na win gem, tasol long wiken dispela spirit i no stap olsem na ol go daun long Tigers.

Stop N Shop Pot Mosbi Vipers i kisim malolo long namba wan raun na dispela wiken na bai ol bungim Lae Tigers long Lae. Vipers na Tigers i gat wankain pilai na sapos Vipers i bihain plen bilong Kosa bai ol i winim pilai

Long dispela wiken tu bai lukim Lions bai bungim Wigmen long Kundiawa, Mioks bai kisim haiwe go long Mendi long bungim Muruks, Tumbi bai kisim tu haiwe go long Hagen long bungim Eagles na Lahanis bai flai go long Kokopo long bungim Rabaul Gurias.

# Isapea gat nupela tim

## Nicky Bernard i raitm

GULF Isapea i senisim tim bilong ol wantaim ol nupela na yangpela mangi long kisim ol i go insait long fainel bilong Digicel Kap.

Planti long ol dispela mangi em ol sumatin bilong yunivesti na hai skul insait long long Pot Mosbi. Dispela nupela tim i gat ol tripela olupela pilaia husat i bin pilai long las sisen.

Tim Gulf Isapea i bin stap insait long resis bilong Digicel Kap long tripela yia na ol i kam daunbilong long lata. Dispela em bai namba 4 yia bilong ol long stap insait gen long resis bilong dispela semi profesinel ragbi insait long kantri.

Siaman bilong Isapea Jacob Ivarua i tok em i amamas long selekta long makim ol dispela yangpela mangi long stap insait long tim.

Em tok maski Isapea em tim bilong Gulf tasol planti long ol Papua Niugini mangi i pilai long dispela tim long karim nam bilong Gulf.

"Gulf Isapea i gat gutpela sponsa i kam long

MRDC na sampela bisnis manmeri na ol i laikim tim long winim sampela pilai bilong ol long karim nem bilong kampani bilong ol.

Olsem na ol seletas i mekim bikipela wok long makim ol mangi we ol gat tingting long pilai ragbi long karim nem bilong Isapea na ol yet wantaim" Siaman Jacob i tok.

Gulf Isapea i kisim ne-ming rait i kamap long bikipela sponsa bilong MRDC aninit long PRK em wanpela han bilong MRDC.

Long wiken ol dispela nupela tim PRK Gulf Isapea i bin flai i go long Kokopo long opim pilai bilong ol long dispela sisen wantaim Rabaul Gurias.

Ol dispela nupela tim PRK Isapea i bin pait bek tru long namba tu hap na klostu mekim sindaun bilong ol Gurias bagarap taim ol lus long 22-18 long ful taim.

Dispela wiken ol boi bilong PRK Isapea bai kisim malolo na bai bungim gen Pot Mosbi Vipers long namba tri raun bilong Digicel Kap. Ples bilong pilai bai PNGNRL bai tokaut long en long wik antap.

## Sampela bilong ol nupela mangi bilong PRK Isapea long lonsing bilong nupela yunifom.

Poto Nicky Bernard



# PNG Meri kriket kamap gut wantaim Australia trena

## Pastaim Australia kriket sempion, Joanne Broadbent, i kam helpim ol meri PNG kriket long redi long Pasifik Gems.

Broadbent i bin wanpela Australia Tes Kriket pilaia na nau Nu Saut Wales Meri kosa, i kamap long PNG pinis na em i stat wantaim trening bilong ol Pasifik MMI PNG Lewa olsem bilong redim ol PNG meri kriket tim long strongim save na stail bilong pilai insait long Pasifik Gems long mun Julai.

Insait long wokabaut bilong em, Mis Broadbent i helpim ol meri long Nesenel Rijnol Wimen Sempionship we i bin kamap long las wik insait long Nesenel Kepital Distrik.

Broadbent i raun tu aninit long plak bilong Pasifik MMI PNG Lewa. Long Japan las yia em i

bin stap kosa bilong Pasifik MMI PNG Lewas long taim ol i kamap sempion bilong Is Esia Pasifik. Mis Broadbent i tok olsem we bilong tim i pilai na winim tonamen, i soim wanem kain mak bilong kriket em ol meri i kisim pinis insait long las 3-pela yia.

"Tim bilong ol meri i stap gut stret bihain long dispela las raun bilong ol long Japan long taim bilong EAP Tonamen, na mi amamas tru long wok klostu wantaim Nesenel Wimen Kosa," Mis Broadbent i tok.

Nesenel Wimen Sempionsip i bin kamap long 17 i go 19 Epril. Em i makim taim we ol gem opisa i luksave long save bilong ol meri long pilai na ol i ken makim kantri long ol intenesenel gems olsem Pasifik Gems long Julai.

Kriket PNG Jeneral Menesa Greg Campbell i tok, "Em i gutpela long kisim wanpela kain meri olsem Joanne husat i gat ekspiriens olsem wanem intenesenel pilaia na wanpela kosa we ol tim bilong em i save win."

Broadbent i bin pilai 10-pela tes mets na 60 wan de intenesenel (ODI) i bin pilai 10-pela tes resis na 60 Wan De Intenesenel (ODI's) long makim Australia. Em i save pilai olgeta gem na long pilai bilong em, em i bin kisim skoa 200 taim Australia i pilai wantaim Inglan.

Em i bin mekim gutpela wok wantaim ol yangpela PNG meri long taim em i bin go pas long ol pilai resis bilong ol stet bilong Australia; em i bin mekim wanpela wokabaut i kam long PNG long luksave long ol stail bilong ol meri.



Joanne Broadbent long eksen long Amini Park wantaim ol Pacific MMI PNG Lewa.



# OI wiken spot long poto

OI poto: Nicky Bernard



↑ Pilaia bilong Hohola Flais i takolim pilaia bilong Taragau long Pot Mosbi ragbi lig pilai bilong ol.



↑ Pilaia bilong Transports i ron wantaim bal taim pilaia bilong ESPANS i tasim long Koparet Tas resis long Mosbi.



↑ Pilaia bilong Vision City i pilaim bal taim pilaia bilong ANZ i tasim em long pilai bilong ol meri long Kopret tas.

→ OI mama tu i laik mekim nem long bouling long Mari Bareks Bouling Klap.



↑ TIM Isapea wantaim nupela yunifom bilong ol i sanap wantaim ol tim opisel. Isapea i pilai long wiken long Kokopo long opening gem bilong Digicel Kap. OI i lus long Rabaul Gurias 22-18.



↑ Mari Bareks Bouling Klab i wok long kam laip long olgeta Sande.



**IMPROVED TASTE!** Niupela teist wantaim planti mit na oil. Teistim na bai yu laikim moa yet.

# DIANA

Tuna



Emi tuna  
bilong PNG

PROUDLY  
PNG  
MADE

Manufactured by



RD Tuna Cutters Ltd.

Moa mit na  
oil insait



TUNA IN OIL

# Hunters flai aut wantaim win



SP PNG Hunters bai flai aut long dispela wiken long bungim ol Burleigh Bears long Australia long Pizzey pilai graun.

Hunters i bin lusim tupela pilai bilong ol long Australia long tupela wiken i go pinis tasol ol i mekim gut long las wiken taim ol bungim Mackay Cutters long hom graun long Kalabon long Kokopo Is Nu Briten Provins.

Long dispela pilai, ol Hunters i bin pilai gut tru, maski skoa i stap long 26-24 tasol kosa Michael Marum i bin amamas long ol boi bilong em.

Long dispela wiken, SP PNG Hunters i no senisim lain ap bilong ol taim ol i pilai long Kokopo. Dispela wankain tim lain ap bai flai go long Australia long bungim ol Bears.

Hunters i gat gutpela lain ap long winim gem wantaim ol Bears sapos ol i bihainim gem plen bilong kosa bilong ol. Planti bilong ol pilaia i kam bek pinis long tim bihain long ol liklik bagarap long bodi bilong na dispela i senisim liklik stail long pilai bilong ol.

Planti bilong ol yangpela pilaia i wok long lainim hariap tru long ol gem i go pinis, na dispela raun 8 bai lukim ol bai paia lait taim ol i bungim ol Bears.

Lain ap bilong ol long dispela wiken em, 1 Stargroth Amean, 2 David Lapua, 3 Noel Zeming, 4 Thompson Teteh, 5 Adex Wera, 6 Israel Eliab, 7 Atte Bina, 8 Henry Noki, 9 Wartovo Puara Jr, 10 Esau Siune, 11 Kato Ottio, 12 Brandy Peter, 13 Timothy Lomai, 14 Roger Laka, 15 Lawrence Tu'u, 16 Willie Minoga, 17 Adam Korave, 18 Bland Abavu, 19 Ase Boas, 20 Nickson Borana. Kosa bilong ol em Michael Marum.



# ISUZU N-SERIES

*the Perfect Business Partner.*

**BOROKO  
MOTORS**

Port Moresby 325 5255 Lae 472 1144 Madang 422 2659 Mt Hagen 542 1933 Goroka 532 3552 Kimbe 983 5035 Kokopo 982 8193 Tabubil 649 9048  
Email: info@borokomotors.com.pg | Web: www.borokomotors.com.pg

